



PRIJEDLOG

Broj: 01/1-02-968/14
Ilijaš, 30. 04. 2014. godine

ZAPISNIK

sa 18. (osamnaeste) sjednice Općinskog vijeća Ilijaš održane dana 29. 04. 2014. godine, sa početkom u 10h.

Osamnaestom sjednicom OV-a Ilijaš je predsjedavao zamjenik predsjedavajućeg OV-a g-din Mahir Dević.

Prisutni vijećnici:

| RB. | IME I PREZIME |
|-----------------------------|-----------------------|
| SDA | |
| 1 | MAHIR DEVIĆ |
| 2 | NEDIM MATORUGA |
| 3 | SAUDIN DURMIĆ |
| 4 | HALID DIZDAREVIĆ |
| 5 | AMAR DOVADŽIJA |
| 6 | MUAMER DERVIŠEVIĆ |
| 7 | FAHIR HASANOVIĆ |
| 8 | RASIM ŠEHIĆ |
| 9 | SELMA PUŠINA |
| SDP | |
| 10 | ALAN ŠERAK |
| 11 | MARIONETA ILIĆ-JURETA |
| 12 | DAMIR FILIPOVIĆ |
| 13 | SELVER HERIĆ |
| SBB | |
| 14 | ADEM EFENDIĆ |
| 15 | NIJAZ MAŠIĆ |
| 16 | SEAD ŠEHIĆ |
| 17 | AKIF BEŠLIJA |
| SAMOSTALNI VIJEĆNICI | |
| 18 | EDHEM HASANOVIĆ |
| 19 | ASIM MUJIĆ |
| STRANKA ZA SREDNJE | |
| 20 | BESIM GLJIVA |
| 21 | AIDA MALIŠEVIĆ |
| LDS | |
| 22 | NIJAZ RASTODER |
| 23 | NIHAD BUČUK |

| | |
|----|----------------------------|
| | BPS |
| 24 | MUHAMED HANDŽIĆ |
| | SAMOSTALNI VIJEĆNIK |
| 25 | DIZDAREVIĆ ENES |

Prisutni gosti:

1. Semir Spahić - Radio Ilijaš
2. RTV Vogošća
3. Šemso Jusić – predsjednik Savjeta MZ Podlugovi
4. Mehmed Smajlović – predsjednik Savjeta MZ Mrakovo
5. Almira Ćosić – volonter
6. Nermina Smajić – volonter
7. Mulija Avdić – volonter
8. Enisa Mešetović - volonter
9. Adela Bešlija - volonter
10. Sena Softić-Taljanović-direktorica Zavoda za hitnu medicinsku pomoć
11. Nijaz Šitković – direktor DZ Ilijaš
12. Fikreta Salihović - predstavica JU "Apoteke Sarajevo"
13. Saudin Mešetović – direktor JKP "Vodostan" d.o.o. Ilijaš

Ostali prisutni:

1. Akif Fazlić – općinski načelnik
2. Nijaz Spahić – pomoćnik načelnika
3. Zdravko Barić – pomoćnik načelnika
4. Merima Osmanović – pomoćnik načelnika
5. Sanja Zagorac-Jozić – pomoćnik načelnika
6. Alma Imamović – pomoćnik načelnika
7. Sadeta Brkić – pomoćnik načelnika
8. Meliha Avdibegović – pomoćnik načelnika
9. Ilda Kahriman – sekretar OV-a
10. Adha Masnopita – stručni saradnik u Službi za društvene djelatnosti
11. Maida Habibović – zapisničar.

Predsjedavajući je otvorio sjednicu i konstatovao da postoji kvorum za odlučivanje.

Zatim je dao na razmatranje zapisnik sa 17.sjednice OV-a.

Primjedbi na zapisnik nije bilo, pa je OV-a jednoglasno usvojilo zapisnik sa 17. sjednice OV-a.

Vođenje sjednice je nastavio zamjenik predsjedavajućeg Mahir Dević.

Pročitao je predloženi dnevni red i dao na razmatranje.

SADETA BRKIĆ – pomoćnik načelnika

Predlagač povlači sa dnevnog reda rješenja u tački 7. pod b), c), d) i e), jer do termina održavanja sjednice Vijeća za navedena rješenja nisu stigla mišljenja Pravobranilaštva Kantona Sarajevo.

MAHIR DEVIĆ – zamjenik predsjedavajućeg

Dobili smo prijedlog Komisije za provođenje izbora u mjesnim zajednicama općine Ilijaš da se na dnevni red uvrsti Izvještaj o radu ove komisije.

Predlagač ovog akta nije prisutan na sjednici kako bi dao obrazloženje za ovu dopunu.

ADEM EFENDIĆ – vijećnik SBB-a

Naveo je da je izvršena povreda Poslovnika o radu OV-a kada je u pitanju sazivanje, priprema i predlaganje dnevnog reda. Član 70. Poslovnika o radu OV-a kaže da dnevni red priprema kolegij, a predlaže predsjedavajući OV-a.

MAHIR DEVIĆ – zamjenik predsjedavajućeg

Kolegij je i pripremio dnevni red, te je dao pet minuta pauze kako bi se predsjednici klubova dogovorili oko prijedloga da se u dnevni red uvrsti Izvještaj komisije za provođenje izbora u mjesnim zajednicama.

MAHIR DEVIĆ – zamjenik predsjedavajućeg

U međuvremenu nam je predsjednik Komisije za provođenje izbora u mjesnim zajednicama kazao da su oni predlagači gore navedene tačke.

Predložio je da se ovaj izvještaj stavi pod tačku 9. dnevnog reda, te zamolio sekretara OV-a da pravno obrazloži da li se dnevni red može dopuniti sa ovom tačkom ili ne.

SEKRETAR OV-a – Ilda Kahrman

Član 70. stav 4. Poslovnika o radu OV-a kaže da se prije nego što se usvoji, dnevni red može proširiti ili skratiti.

ADEM EFENDIĆ – vijećnik SBB-a

Pozivam sekretara da ponovo izađe i pročita stav 4. člana 70. i da nastavi čitati član 71. ovog Poslovnika do kraja.

SEKRETAR OV-a – Ilda Kahrman

Član 70. stav 4. Poslovnika o radu OV-a kaže da se prije nego što se usvoji, dnevni red može proširiti ili skratiti i nema potrebe da čitam dalje.

ADEM EFENDIĆ – vijećnik SBB-a

Pročitao je član 71. Poslovnika o radu OV-a.

MAHIR DEVIĆ – zamjenik predsjedavajućeg

Obzirom da koordinator za poslove sa mjesnim zajednicama i članovi komisije za provođenje izbora u mjesnim zajednicama trenutno nisu prisutni predlažem da izvještaj stavimo pod tačku 9., a dobili smo i tumačenje sekretara OV-a.

MUHAMED HANDŽIĆ – vijećnik BPS-a

Sastavni dio ove devete tačke je i odluka o imenovanju i davanju mandata savjetima mjesnih zajednica. Pitam predsjednika komisije da li su ispoštovan sve pravne procedure, odnosno svi žalbeni rokovi ? Koliko znam, bilo je žalbi drugostepenoj komisiji koja nije zasjedala ?

MAHIR DEVIĆ – zamjenik predsjedavajućeg

Dakle, da li se slažete da ovaj izvještaj stavimo pod tačku 9. ?

OV-e je glasalo, ali je vijećnik Adem Efendić izrazio sumnju u glasanje i zatražio pojedinačno glasanje.

ZA su glasali slijedeći vijećnici: Mahir Dević, Saudin Durmić, Halid Dizdarević, Amar Dovadžija, Muamer Dervišević, Fahir Hasanović, Rasim Šehić, Selma Pušina, Alan Šerak, Marioneta Ilić-Jureta, Damir Filipović, Edhem Hasanović, Asim Mujić, Aida Mališević, Nijaz Rastoder, Nihad Bučuk, Muhamed Handžić i Enes Dizdarević

PROTIV su bili slijedeći vijećnici: Adem Efendić, Sead Šehić i Akif Bešlija

UZDRŽANI su bili slijedeći vijećnici: Selver Herić

Odsutni vijećnik: Nijaz Mašić i Besim Gljiva

Konstatovano je da je sa 19 glasova ZA, 3 PROTIV i 1 UZDRŽANIM usvojeno da Izvještaj o radu Komisije za provođenje izbora u mjesnim zajednicama općine Ilijaš bude 9. tačka dnevnog reda.

Zatim je OV-e sa 20 glasova ZA i 3 PROTIV usvojilo slijedeći

DNEVNI RED

1. Vijećnička pitanja i inicijative
2. Izvještaj o realizaciji zaključaka sa 17 sjednice OV-a
3. Prijedlog Odluke o utvrđivanju interesa za organizovanje i održavanje Manifestacije kulture, sporta i trgovine "Ilijaški dani"
4. Prijedlog Odluke o novčanim podrškama u poljoprivrednoj proizvodnji na području općine Ilijaš za 2014.godinu
5. Prijedlog Odluke o imenovanju člana Općinske izborne komisije Ilijaš
6. Izvještaj o poslovanju JKP "Vodostan" d.o.o. Ilijaš za 2013. godinu
7. Prijedlog rješenja iz imovinsko-pravne oblasti:
 - a) rješenje broj:06/1-31-603/14/HM
 - f) rješenje broj:06/1-31-1162/14/HM
 - g) rješenje broj:06/1-31-1163/14/EH
8. Informacija u oblasti zdravstva na području općine Ilijaš
9. Izvještaj o radu Komisije za provođenje izbora u mjesnim zajednicama na području općine Ilijaš.

AD-1
Vijećnička pitanja i inicijative

SELVER HERIĆ – vijećnik SDP-a

Pitanje:

1. Tražim od nadležne službe da mi za prošlu godinu i za svaki mjesec ove godine, dostavi koliko ko, po rješenju, ima pravo koristiti ulicu 126.Ilijaške brigade (glavnu) i koliko ko koristi i koliko plaća za istu. Svjedoci smo da je prilično ista ulica uzurpirana od strane ugostiteljskih i drugih objekata i mislim da bi komunalni inspektor trabao ući u srž ovog problema, ako ga ima? Vijećnici SDP-a nemaju ništa protiv zauzimanja prostora, ali smo za to da se korištenje istih adekvatno plati, jer ta ulica treba pomoći općini za vraćanje kredita koji iznosi 1 milion KM.

Inicijativa:

1. Pokrećem inicijativu da se današnja dnevnicu svih vijećnika presignira na račun Amara Dovadžije kome je supruga poginula, kako bi mu bar malo pomogli oko troškova koji su ga zadesili.

Tražim da ovu inicijativu pretvorimo u zaključak i glasamo.

Općinsko vijeće je jednoglasno donijelo

ZAKLJUČAK

Dnevnicu vijećnika Općinskog vijeća Ilijaš sa 18.sjednice održane dana 29.04.2014.godine doznačiti na račun vijećnika Amara Dovadžije.

AIDA MALIŠEVIĆ – vijećnica Stranke za Srednje

Pitanje:

1. Zašto mjesni ured u Srednjem radi samo dva dana u sedmici? Zbog velikih potreba stanovnika ovog dijela općine, mjesni ured bi trebalo da radi pet,a ne samo dva dana u sedmici.
2. Zašto građani općine Ilijaš plaćaju takse za ovjeru kopija dokumenata, dok se u drugim, susjednim općinama, ne plaćaju?
3. Zašto niti jedan od stanovnika "gornjeg kraja" nije dobio platenik, iako postoje socijalno ugrožene porodice na tom području?

ASIM MUJIĆ – samostalni vijećnik

Inicijativa:

1. Tražim od Službe za imovinsko-pravne poslove, geodetske poslove i katastar općine Ilijaš, da geometar izađe u ulicu "Polomska" u MZ-e Podlugovi kako bi označio koji su privatni, a koji općinski putevi.

SAUDIN DURMIĆ- Vijećnik SDA

Pitanja:

1. Je li služba za opću upravu i lokalnu samoupravu Općine Ilijaš zaprimila zahtjev grupe omladinaca s područja Starog Ilijaša za dodjelu prostorije za omladinske aktivnosti?

Molim nadležnu službu da me informiše o trenutnim aktivnostima oko pomenute inicijative. Napominjem da je omladina Starog Ilijaš i prije agresije na BiH imala prostoriju u Jahorini i molim da nadležna služba izvrši uvid u prostorije na pomenutom lokalitetu i dodjeli adekvatnu prostoriju na korištenje.

2. Kada će biti riješen problem elektro snadbijevanja na području Starog Ilijaša, konkretno Karaule?

Da li je pomenuto pitanje tretirano kroz operativni plan Elektrodistribucije Sarajevo ? U narednom periodu ovaj problem treba biti prioritet u rješavanje. Naime, niskonaponska mreža u ovom području je katastrofalna, opasna i dotrajala, a građani imaju problem nedovoljnog napona.

Inicijative:

1. Pokrećem inicijativu za rješavanjem imovinsko- pravnih odnosa na području mjesne zajednice Misoča (Mrakovac od spoja sa lokalnim putem do rijeke Misoče). Cilj je proširenje puta i uređenje saobraćajnice. Razgraničenje je potrebno prevashodno zbog uređenja pomenutog puta i u javnom je interesu. Tražim da nadležna služba razgraniči i utvrdi ima li eventualnih uzurpacija i eventualne uzurpante vrati u granice posjeda.
Građani su prikupili određena finansijska sredstva za proširenje pomenutog puta i preduslov je da se isti omeđi.
2. Pokrećem inicijativu o regulisanju izbornog područja Ilijaš Stari. Građani dijela MZ Ilijaš Stari već duže vrijeme glasaju na biračkom mjestu Ilijaš Grad 1. Radi se o građanima naselja od Jahorine do dijela naselja Vlaškovo. Građani su pokrenuli inicijativu vezano za ovo pitanje. Molim Općinsku izbornu komisiju Ilijašda ovo pitanje uredi i udovolji zahtjevima građana ovog područja.

MUHAMED HANDŽIĆ- Vijećnik BPS-Sefer Halilović

Pitanja:

1. Zašto se ne uvede praksa obilježavanja Dana Armije Bosne i Hercegovine u našoj općini?
Obrazloženje: Borci Armije RBiH su svima nama koji danas živimo ovdje obezbjedili slobodu i mir, a vi ste to brzo zaboravili iz vama poznatih razloga. Zašto se ne održi svečana sjednica Općinskog vijeća, na koju bi se pozvale šehidske porodice i porodice poginulih boraca, RVI, naši heroji-Zlatni ljljani, komandanti i komandiri i svi borci koji su branili Ilijaš ? Zašto tog 15.aprila nismo organizovali i sa ponosom obišli šehidska mezarja i na kraju, kada se mi ovako ponašamo, moramo se upitati kakva će biti sudbina mlađih generacija ?
2. Za koliko se mjeseci u godini plaća zakupnina za ljetne bašte u Ilijašu koje koriste

vlasnici ugostiteljskih i drugih objekata?

Zahtijevam da se za sljedeću sjednicu OV-a pripremi izvještaji od strane nadležne službe, a koji će sadržavati sljedeće:

- ime i prezime zakupca,
- površinu koju koristi u kvadratnim metrima i
- ukupan iznos zakupnine za prošlu godinu u KM po zakupcu

Obrazloženje: Prema informacijama sa kojima raspolazem, te zakupnine se plaćaju samo za sedmi, osmi i deveti mjesec u godini, te da zakupci koriste znatno veću površinu od zakupljene, što bi bila nadležnost komunalnog inspektora da to dovede u red.

3. Zašto nisam dobio odgovor na pitanje koje sam postavio na prošloj sjednici OV-a, a koje se odnosilo na izgradnju kafanske pozornice u parku na Banovcu, narušavajući Regulacioni plan grada Ilijaša i uništavajući zelenilo i parkovske sadržaje.

Obrazloženje: Moje pitanje se odnosilo na prostor koji je uzurpiran od strane vlasnika ugostiteljskog objekta "Mistik" u svrhu tzv. ljetne bašte, koja po svom izgledu najmanje liči na baštu, a sve više na građevinu. U tom smislu zahtijevam od načelnika općine Ilijaš i njegove nadležne službe da ovaj slučaj do kraja riješe, a u skladu sa Zakonom o korištenju javnih površina, te da o tome izvjestite ovo Općinsko vijeće.

U prilogu: dopis stanara Banovca

NIJAZ RASTODER- Vijećnik LDS

Inicijativa:

1. Pokrećem inicijativu prema JKP "Vodostan" Ilijaš da izađu na teren u Novo Naselje do broja 20., te izvrše popravku vodovodne cijevi koja je pukla.

SELMA PUŠINA- Vijećnica SDA

Pitanje:

1. Da li se bilo šta uradilo po inicijativi koju sam pokrenula prošle godine odmah po završetku šetališta, a tiče se postavljanja saobraćajnog znaka zabrane za bicikla ?

Inicijativa:

1. Inicijativu upućujem Kantonalnoj Direkciji za ceste, a odnosi se na postavljanje usporivača saobraćaja u Mjesnoj zajednici Misoča, pored osnovne škole, te u Mjesnoj zajednici Mrakovo u blizini autobuskog stajališta, a sve u cilju sigurnosti pješaka, a posebno učenika.

SEAD ŠEHIĆ- Vijećnik SBB-a

Inicijativa:

1. Pokrećem inicijativu prema OV-u da se zatraži informacija od tužilaštva KS o kretanju predmeta po izvještaju o počinjenom krivičnom djelu podnesenom od strane građana MZ Stari Ilijaš, a podnesena je protiv Munira Alića šefa katastra u općini Ilijaš. Predlažem da ovu inicijativu pretvorimo u zaključak i molim OV-e da se izjasni po ovom pitanju. Pojedine "gazde" po gradu Ilijašu se hvale kako su pojedine (ne sve) funkcionere u našoj općini kupili da mogu da rade šta hoće, jer im niko ništa ne može.

MAHIR DEVIĆ - zamjenik predsjedavajućeg

Ne vidim svrhu da Vijeće za ovo glasa.

SEAD ŠEHIĆ- Vijećnik SBB-a

Mislim da, kada OV-e zatraži informacije od tužilaštva, to ima svoju težinu, nego da pokreće jedna osoba.

Želim da znamo zašto se to oteže četiri godine, dokle se stiglo sa tužbom i zašto se ne rješava ?

Neka mi neko odgovori zašto se četiri godine ovo pitanje nije riješilo ?

AKIF FAZLIĆ – općinski načelnik

Kada je u pitanju ova tema, meni je poprilično dosta toga nejasno, bez obzira koliku težinu ovakva moja izjava nosi s aspekta kompetencija. Vidim da je ova tužba ne potpisana i šta to znači. To je jedna stvar. Druga stvar je da se sve mora voditi sudskim putem i da se drugačije ne može rješavati i da služba to ne može riješiti kroz upravni postupak. Ono što bi općina mogla, jeste izrada novog regulacionog plana Stari Ilijaš. U postojećem RP nije definisan taj put, a kroz reakciju i prijedloge kada dođe do nacrtu RP Stari Ilijaš da se to uvrsti u RP i da tada djeluje i služba i Vijeće i na taj način riješimo.

Ovo drugo jeste sudski put i ja na to nemam komentara.

Što se tiče roka za ovo mogu reći samo regulacioni plan, a drugi prostor je sud.

MAHIR DEVIĆ - zamjenik predsjedavajućeg

Kolega Seade, u postupku izrade je Regulacioni plan Stari Ilijaš, doći će nam u formi nacrtu, pa Vi svoje djelovanje usmjerite u tom pravcu kroz javnu raspravu i to je put da se ovo riješi.

Učinit ćemo sve da se ovo riješi u korist građana.

Konstatovao je da vijećnik Sead Šehić povlači ovu svoju inicijativu.

HALID DIZDAREVIĆ – vijećnik SDA

Čestitao je Odbojkaškom klubu ulazak u premier ligu, kao i Stonoteniskom klubu, te se nada da će ovi uspjesi biti podstrek i ostalim klubovima u Ilijašu.

Za premier ligu Odbojkaškom klubu će biti potrebna veća sredstva, te apelujem na prijatelje ovog kluba i privrednike da pomognu ovom klubu.

FAHIR HASANOVIĆ – vijećnik SDA

Inicijative:

1. Pokrećem inicijativu da JKP "Vodostan" preuzme vodovod u MZ Dragoradi – Podružnica Sudići.
2. U Podružnici Sudići živi porodica Atifa Durića koja nije snadbjevena sa vodom, jer je kuća udaljena od sela, pa ako može neko iz nadležne službe da izađe na lice mjesta, premjeri i utvrdi da li je voda sa izvora pitka koji je u blizini i na neki način se ova porodica obezbjedi sa vodom.
3. Tražim da se na područje MZ Dragoradi – Podlipnik uputi komunalni općinski

inspektor, kantonalna veterinarska inspekcija, poljoprivredna inspekcija i inspekcija za zaštitu okoliša, a razlog je što na to područje svake godine dolaze velika stada ovaca, a građani sumnjaju da nemaju adekvatnu dokumentaciju, kako zdravstvenu, tako i ostalu koja je potrebna.

BESIM GLJIVA – vijećnik Stranke za Srednje

Inicijativa:

1. Molim da mi menadžment Osnovne škole Srednje dostavi spisak sa brojem uposlenika (ime i prezime, stručnu spremu, od kada su zaposleni i na koji period), kao i sve druge elemente koji će doprinijeti adekvatnom odgovoru na pitanje koje je postavila grupa građana putem vijećnika Stranke za Srednje na nekoj od prethodnih sjednica Vijeća. Također, potrebno je dostaviti sve eventualne ugovore o zakupu, ako ih škola već ima.

Nadam se da će nakon ovog odgovora mnoge stvari biti jasnije i na najbolji način odbaciti sve eventualne sumnje u bilo kakve nepravilnosti.

2. Pokrećem inicijativu da se iskoristi trenutačna mogućnost priključka struje porodici Mirsada Žigića koja je trenutno najugroženija porodica na području Općine Ilijaš i već dvanaest godina živi bez struje, vode, puta i svih drugih osnovnih uslova za život dostojan čovjeka. Potrebno je da općina plati priključak struje navedenoj porodici.

MARIONETA ILIĆ-JURETA – vijećnica SDP-a

Inicijativa:

1. Uputiti zahtjev Ministarstvu saobraćaja Kantona Sarajevo za uvođenje autobuske linije Sarajevo-Dragoradi i Sarajevo-Kamenica, kao i uvođenje linije iza 22h, te da se prilože sve prethodne inicijative kao i peticije koje smo potpisali.

AKIF BEŠLIJA – vijećnik SBB-a

Pitanje:

1. Postavljam pitanje načelniku općine i općinskom organu da mi odgovore u čijoj su nadležnosti lokalni putevi na općini Ilijaš i ko može dozvoliti izvođenje radova na istim, a tiče se prokopavanja i postavljanja fizičkih zapreka.

Obrazloženje: Na lokalnim putevima općine, Kantonalna uprava za šumarstvo - odjeljenje Ilijaš, vrši oštećenja na lokalnim putevima, prokopavaju i postavljaju zapreke i time onemogućavaju aktivnosti građana na privatnim posjedima. Takođe, ovo pitanje sam postavio na prethodnoj sjednici Vijeća i dobio sam odgovor od Kantonalnog ministarstva privrede Sarajevo sa kojim nisam zadovoljan i pitanje nije glasilo na pomenuto ministarstvo.

Inicijativa:

1. Pokrećem inicijativu da nadležna općinska služba i nadležna Direkcija za ceste izađu u Mjesnu zajednicu Mrakovo i odrede mjesta za autobuska stajališta na putu Ilijaš-Mrakovo-Popovići, a potom i postave znakove.

Obrazloženje: Na pomenutom putu nema obilježenih autobuskih stajališta tako da građani

koji koriste prevoz ne znaju gdje su obaveze vozača autobusa da staju.

ADEM EFENDIĆ – vijećnik SBB-a

Na 17.sjednici Općinskog vijeća pokrenuo sam inicijativu da općinski načelnik i općinska nadležna služba do slijedeće sjednice OV-a pripreme prijedlog Odluke o ustupanju i dodjeli poljoprivrednog zemljišta na području općine Ilijaš fizičkim i pravnim licima sa područja općine Ilijaš. Nisam dobio nikakav odgovor, pa ako mi načelnik može sada odgovoriti neka odgovori, ako ne, ponovo pokrećem ovu inicijativu.

Vezano za odovor koji sam dobio, a vezano za dodjelu plastenika, zadovoljan sam, ali ću skrenuti pažnju na rad komisije. Tamo je navedeno da se plastenici dodjeljuju siromašnim porodicama, a uočio sam propuste službi, jer jedna porodica koja je dobila plastenik i navodi se da je šehidska porodica i da nema zaposlenih, ali ima invalidninu, penziju, jedno dijete u SAD-u i jedno dijete ovdje. Takođe, propust kod službe za privredu, finansije i investicije, navedeno je da je osoba nezaposlena, udovica i da školuje troje djece. To nije tačno, jer dvoje djece radi, a za treće nemam informacije. Znači, ubuduće treba da povedete više računa o ovome.

RASIM ŠEHIĆ – vijećnik SDA

Inicijativa:

1. Da se u naselju Borak na Nišićima postave dva kontejnera za odvoz otpada.

Obrazloženje: Mještani i vlasnici vikend objekata koji naseljavaju ovo mjesto (cca 300 kuća i vikend objekata) su poslali zahtjev u kojem su izrazili želju da im se postave kontejneri za koje će plaćati komunalnu taksu.

DAMIR FILIPOVIĆ – vijećnik SDP-a

Inicijative:

1. Da se postavi klupa u šetnici kod šahovskog polja radi potreba penzionera.
2. Edukacija o političkoj kulturi koja podrazumjeva komunikaciju između političkih stranaka koje participiraju u Vijeću.
3. Da mi se dostavi spisak poslovnih prostora koji su u vlasništvu Općine Ilijaš.
4. Da se raspiše javni poziv za zakup poslovnih prostora, te da se visina zakupnine umanji za 15% mladima od 18-30 godina i boračkoj populaciji sa invaliditetom.
5. Postoji li u Općini Ilijaš Pravilnik o materijalnoj i disciplinskoj odgovornosti, te ukoliko postoji zašto ga općinski načelnik ne primjenjuje, te zahtijevam da mi se isti dostavi.
6. Upućujem inicijativu prema određenim uposlenicima da svoje radne obaveze odgovorno izvršavaju, te da svoj nerad i greške ne adresiraju na mene, jer od toga Vas glava može zaboljeti (Služba za prostorno uređenje i stambeno-komunalne poslove i Služba za boračko-invalidsku zaštitu, socijalnu zaštitu i raseljena lica).

AKIF FAZLIĆ – općinski načelnik

Vezano za inicijativu za korištenje poljoprivrednog zemljišta, želim reći da je inicijativa dobra i korisna, ali imamo ograničavajući faktor u Zakonu o poljoprivrednom zemljištu koji traži da, prije svega, Federalno ministarstvo za poljoprivredu, pa kantonalna ministarstva, urade strategiju i programe za korištenje poljoprivrednog zemljišta i na bazi takvih programa onda općine mogu da prave ove vrste odluke na osnovu kojih se može dodjeljivati prostor. To je jedna od otežavajućih okolnosti. Drugo, mi kao općina Ilijaš, kada je u pitanju poljoprivredno zemljište, nemamo velike površine, jer većina poljoprivrednog zemljišta ima namjenu šumsko zemljište. Ostaje naša obaveza da ovo još izučimo i što se može najbolje pripremimo.

Dalje, kada je u pitanju rješavanje pitanja snadbjevanja električnom energijom, koje je pominjao vijećnik Besim Glijiva, Zakon o električnoj energiji je vrlo precizno rekao da se može privremeno priključiti električna energija za objekte koji su u fazi ili postupku legalizacije, na bazi općinske potvrde, na period od godinu dana i dodatno još jednu godinu, a nakon toga se ponovo isključuje struja ako ne završite postupak legalizacije objekta. Naš stav je, ako u toku jedne godine ništa nije urađeno po pitanju legalizacije objekta, nećemo produžavati rok za još jednu godinu.

AD-2

Izveštaj o realizaciji zaključaka sa 17 sjednice OV-a

MUHAMED HANDŽIĆ – vijećnik BPS-Sefer Halilović

Ovi zaključci se, čini mi se, koncipiraju ponovo, kada ih mi izglasamo ovdje i dobiju potpuno novi sadržaj. Ovo se odnosi na zaključak br.3 koji glasi: "Da nadležna služba (Služba za prostorno uređenje i stambeno-komunalne poslove) Općine Ilijaš, izvrši kontrolu izgradnje objekta na Banovcu u vlasništvu Šehić Envera i ako je u skladu sa zakonom da nastavi izgradnju, u protivnom da obustavi istu i dovede u red prvobitno stanje". Niko nije tražio kontrolu objekta koje je u vlasništvu Šehić Envera. U pitanju je ljetna bašta, ja sam je nazvao betoska pozornica, koja je zauzela ulicu.

Odgovor nije u skladu sa očekivanim.

Diskutanata po ovoj tački dnevnog reda više nije bilo, pa je OV-e sa 18 glasova ZA i 1 PROTIV usvojilo

Izveštaj o realizaciji zaključaka sa 17 sjednice OV-a

AD-3

Prijedlog Odluke o utvrđivanju interesa za organizovanje i održavanje Manifestacije kulture, sporta i trgovine "Ilijaški dani"

SANJA ZAGORAC-JOZIĆ – pomoćnik načelnika

Komisija za statut i propise nije imala primjedbi na pravni osnov i pravno-tehničku usklađenost ove odluke. Razlog za prijedlog nove odluke nalazi se u slijedećem: godine 2011. donesena je odluka koja je prethodila ovoj u kojoj smo uočili određene nedostatke, prije svega, tom odlukom je bilo definisano da će se manifestacija održavati svake godine od 01. do 07.jula, ali evo imamo situaciju da bi se manifestacija održala u dane mjeseca Ramazana što ne bi bilo uredu, te smo ovom novom odlukom predložili da će se manifestacija održavati svake godine, a vrijeme i dužinu trajanja će određivati

organizacioni odbor. Također, uočeno je da iz godine u godinu slabi interes pojedinih subjekta koji su participirali u radu Organizacionog odbora da i dalje sudjeluju u njegovom radu, tako da je predložen manji broj članova sa ranijih 11 na novih 7 članova koji su vezani tačno za osobe koje obnašaju određene rukovodeće dužnosti. Cilj donošenja nove Odluke je i rasterećenje godišnjeg Programa rada Općinskog vijeća Ilijaš koje je do sada godišnje imalo tri programske tačke koje su se odnosile na Manifestaciju od donošenja Zaključka o imenovanju Organizacionog odbora Manifestacije kulture, sporta i trgovine "Ilijaški dani", razmatranja Izvještaja o organizaciji, toku, prihodima i rashodima Manifestacije i donošenja Odluke o utrošku dobiti Manifestacije. Novom Odlukom data su nešto veća ovlaštenja Organizacionom odboru koji zajedno sa JU "KULTURNO-SPORTSKI CENTAR I RADIO ILIJAŠ" usvaja Izvještaj o organizaciji, toku, prihodima i rashodima Manifestacije koji će Javna Ustanova svake godine podnositi Općinskom vijeću kao zaseban dio Izvještaja o radu i finansijskom poslovanju JU "KULTURNO-SPORTSKI CENTAR I RADIO ILIJAŠ" ILIJAŠ za prethodnu godinu. Također, cilj je da se uvede više kontrole u segmentu koji se odnosi na korištenje i izdavanje javnih površina u periodu održavanja Manifestacije. Nosioc aktivnosti na pripremi i realizaciji Manifestacije ostaje JU "KULTURNO-SPORTSKI CENTAR I RADIO ILIJAŠ". Predlagač je ovim uvažio višegodišnje iskustvo ove Ustanove u organizaciji Manifestacije, koja je ujedno i utemeljitelj Manifestacije, prostorne i ljudske kapacitete kojim raspolaže, a prije svega da je Ustanova osnovana zbog postojanja javnog interesa za obavljanje javne službe iz djelatnosti kulture i sporta i da se već finansira iz općinskog budžeta, tako da nije potrebno izdvojiti dopunska sredstva za angažovanje novih izvršilaca u svrhu realizacije Manifestacije. Na kraju, ovom Odlukom objedinjena su sva dobra iskustva u organizaciji ove Manifestacije proteklih godina, a na dobrobit i zadovoljstvo prije svega građana općine Ilijaš.

MARIONETA ILIĆ-JURETA – vijećnica SDP-a

Zamolila bih samo da se za ovu manifestaciju obezbjedi prostor za izlagače ručnih radova i udruženja koja njeguju ručne radove, tradiciju, kao i za sportska udruženja i na taj način malo više afirmišemo sport na području općine Ilijaš.

DAMIR FILIPOVIĆ – vijećnik SDP-a

Moje mišljenje je da ove godine treba izbaciti trgovinu, te predlažem zaključak da se ova manifestacija svede na manifestaciju kulture i sporta "Ilijaški dani". Takođe predlažem, da radno vrijeme održavanja manifestacije traje do 12h i da se dani trgovine izbace iz manifestacije ili izmjestite tamo gdje neće narušavati javni red i mir.

NIJAZ RASTODER – vijećnik LDS-a

Želim apelovati na organizatore manifestacije da šatori ne budu u blizini džamije.

AKIF BEŠLIJA – vijećnik SBB-a

U odluci nije navedeno da li organizacioni odbor ima ili nema naknadu, a u prošloj odluci je to bilo navedeno.

SEAD ŠEHIĆ – vijećnik SBB-a

Postavio bih pitanje organizatoru da li su vodili računa o pribavljanju potrebnih saglasnosti (npr. policije ili nekog drugog organa), jer se šatori postavljaju u blizini saobraćajnica i željezničke pruge ?

ADEM EFENDIĆ – vijećnik SBB-a

Pitat ću predlagača da mi pojasni član 5. gdje je navedeno da će se javne površine koje će se koristiti u periodu održavanja Manifestacije, a koje će se definisati posebnom Odlukom Organizacionog odbora, ustupaju se bez plaćanja naknade za korištenje javne površine Općini Ilijaš. Mislim da je u suprotnosti sa postojećom odlukom i prijedlogom odluke koja je formi nacрта sa članom 49. gdje se kaže da javne površine u periodu manifestacije se ne smiju izdavati po manjoj cijeni od one koja stoji u odluci, a sada je u ovoj novoj odluci predloženo da će se ustupati bez naknade.

SANJA ZAGORAC-JOZIĆ – pomoćnik načelnika

Ovo što je vijećnica Marioneta pitala, želim reći da je to bila praksa i ranijih godina i to ćemo svakako uvažiti. Takođe želim naglasiti da i sportska udruženja uvijek uzimaju učešće u okviru ove manifestacije.

Kada je u pitanju prijedlog predsjedavajućeg OV-a Damira Filipovića da se ukine trgovina, interes je iz godine u godinu sve manji i mislim da i organizacionom odboru dobro dođe trgovina, jer se od toga finansiraju svi sadržaji manifestacije.

Naknada za rad organizacionog odbora se nije ni ranije plaćala, a to će vjerovatno i poslovnikom o radu organizacionog odbora biti regulisano, ali možemo to i u ovoj odluci navesti.

Svake godine se definišu površine koje se izdaju za vrijeme manifestacije i nastoji se zaštititi ona raskrsnica na Alića rampi. Međutim, imamo naših nesavjesnih ugostitelja koji, bez obzira na odluku, asistenciju policije, komunalnog inspektora, nastoje šator što više približiti ovoj raskrsnici. Prošle godine smo ga uspjeli malo udaljiti prema parkingu automoto kluba.

Ovo što je vijećnik Adem Efendić govorio, želim reći da ovo Vijeće donosi odluku, odnosno daje saglasnost komisiji da može izdati te površine. Predlagač odluke o izdavanju javnih površina treba sugerisati da u vrijeme trajanja manifestacije izdvoji te površine.

Što se tiče radnog vremena, bilo je definisano do 1, ali ako vi kažete do 12h, mi prihvatamo prijedlog da radno vrijeme bude do 12h odnosno 24h.

RASIM ŠEHIĆ – vijećnik SDA

Pohvalio bih ovaj način organizovanja Manifestacije "Ilijaški dani".

Na fonu prijašnjih diskusija, razmišljao sam da bi za ovu našu pješačku zonu kada je u pitanju povrat novca, trebalo bi donijeti posebnu odluku za tih sedam dana o naknadi za ove naše "bašte".

MUHAMED HANDŽIĆ – vijećnik BPS-Sefer Halilović

Zamolio bih da organizatori ove godine angažuju neku osiguravajuću firmu kako bi naplatili od zakupaca zakupninu ili na neki drugi način. U svakom slučaju nama treba trgovina. Na Ilijaškim danima ne treba da bude zastupljena samo kineska roba, nego bi to trebalo da

budu dani ilijaških brendova (ilijaške hrane, ilijaške jagode, trešnje, meda, itd.). Za to se treba pripremiti i obezbjediti prostor i vrijeme.

MAHIR DEVIĆ – zamjenik predsjedavajućeg

Možda bi ovo trebalo sugerisati organizatoru, pa da jedan dan bude određen za ilijašku poljoprivredu, pa da se tu izlože proizvodi.

Dakle, u članu 3. odluke dodati stav 2. u kojem navesti da će organizacioni odbor raditi bez naknade i u članu 8. navesti da se radno vrijeme u toku manifestacije završava do 24h.

BESIM GLJIVA – vijećnik Stranke za Srednje

Ja bih, prije svega, ovu manifestaciju nazvao "Ilijaški vašar" i mislim da je to prikladan naziv za ovu manifestaciju. Dalje, nije mi jasno iz godine u godinu, da li mi hoćemo, ili služba, ili organizator, da ostvari finansijski rezultat od ove manifestacije ili ono hoće da bude kulturni i da prikaže svu kulturu Ilijaša, a da ga to ništa ne košta. Ja ovo sugerišem iz svog ličnog iskustva. Znači, odredite hoćete li da ostvarite finansijski efekat, onda je to sasvim drugačija organizacija ili odriješite kesu i napravite pravu manifestaciju. Ova manifestacija je iz godine u godinu lošija, ne liči na ono za šta je mi predstavljamo i ona će se sama pretvoriti u ono što sam na početku predložio.

AKIF FAZLIĆ – općinski načelnik

U samom nazivu manifestacije mi smo rekli šta želimo. Znači, manifestacija kulture, sporta i na kraju trgovine i to jeste cilj ove manifestacije. Također, ko god je bio sudionik ove manifestacije sigurno može potvrditi da se svaki dan odvijao po jedan kulturni događaj. Također se svaki dan odvijao niz sportskih događaja gdje se pružila prilika našim sportskim klubovima da učestvujemo. Kada odvojimo ovo od trgovine, onda trgovina jeste vašar, ali mi nemamo razlog da odvajamo ove dijelove od trgovine i intencija ove odluke jeste i vidi se da sve više želimo i potenciramo ovo što se zove kultura i sport i želim da na objektivan pristup prilazimo i svi dajemo svoj doprinos da ovo bude iz godine u godinu uspješnije.

BESIM GLJIVA – vijećnik Stranke za Srednje

Maloprije sam zaboravio reći da nisam za besplatan rad organizacionog odbora i mislim da je suvišno da neko to radi džaba, jer ni do sada to niko nije radio džaba, pogotovo onda kada je bilo para u Ilijašu. Prilikom same organizacije, trebalo bi da organizacioni odbor u svom planu uvrsti dio manifestacije i na "gornji kraj" Ilijaša. Znači, da neka od manifestacija se održi na Gajevima, Srednjem itd.

MAHIR DEVIĆ – zamjenik predsjedavajućeg

Dao je na glasanje prijedlog odluke, uz izmjene u članu 3. i članu 8. kako je ranije navedeno. OV-e je sa 20 glasova ZA i 4 UZDRŽANA donijelo

Odluku o utvrđivanju interesa za organizovanje i održavanje Manifestacije kulture, sporta i trgovine "Ilijaški dani"

Prijedlog Odluke o novčanim podrškama u poljoprivrednoj proizvodnji
na području općine Ilijaš za 2014.godinu

NIJAZ RASTODER – vijećnik LDS

Imam primjedbe na član 9., tačnije u tabeli gdje piše ostale podrške (uložit ću i amandman), gdje tražim da se pod ostale podrške briše 1,2 i 3, a 4. bi bilo 1, a sredstva 5000 KM za zadruge (kakve zadruge, ko je prodao 1kg jagoda preko naših zadruga i ko je bilo šta imao koristi od ovih zadruga) i tražim da se briše i stavlja pod a) na animalnu proizvodnju. Dalje, učešće na sajmovima i seminarima (ne znam šta je ovo pomoglo seljacima od ovih seminara), osim onoj grupi od 10-15 ljudi koja se šeta od Novog Sada do Ljubljane.

Podrška izradi projekata, strategija, programa iz oblasti poljoprivrede proizvodnje - to je bacanje novca. Ovdje treba ovih 11.000 KM prebaciti na držanje muznih krava i to od 1-10, tako da i oni što imaju po jednu kravu da se i njima pomogne.

Na strani 6. gdje su ostale podrške brisalo bi se 1,2 i 3.

NEDIM MATORUGA – vijećnik SDA

U smislu ovoga što je kolega Rastoder rekao mislim, ukoliko tražite od OV-a da glasa za nešto, morate obrazložiti finansijsku sliku ovoga što predlažete. Ako kažete da svako ko ima jednu kravu će dobiti podsticaj, onda nam recite koliko ima ljudi na području općine Ilijaš sa jednom kravom. Ne slažem se da se skidaju tačke koje ste predložili i ne slažem se da od edukacije nema ništa.

AKIF FAZLIĆ – općinski načelnik

Predlagač ne može prihvatiti amandman vijećnika Nijaza Rastodera, jer mijenja suštinu odluke. Ovo nije odluka o socijalnim pomoćima. Mi smo nekada imali u odluci 2 muzne krave i uspjeli smo podići na 3, a intencija bi bila da slijedeće godine podignemo na 4 ako želimo razvoj poljoprivrede. Mnoge porodice imaju kravu za sebe i nije cilj ove odluke to.

Što se tiče sajмова, prije svega posjete u Novom Sadu, Beogradu, sajmovima u Hrvatskoj, bile su izuzetno uvijek kapacitirane i sigurno imaju efekte.

Kada su u pitanju zadruge, mi generalno imamo problem organizovanja privrednika. Oni su i dalje na stanovištu nekog svog pojedinačnog djelovanja, ali bez velikih i jakih udruženja ne mogu izaći na tržište.

NIJAZ RASTODER – vijećnik LDS

Povlačim amandman, a vidjet ćemo kakve će koristi građani imati od ovih sajмова.

Diskutanata po ovoj tački dnevnog reda više nije bilo, pa je OV-e sa 23 glasa ZA i 2 PROTIV donijelo

Odluku o novčanim podrškama u poljoprivrednoj proizvodnji
na području općine Ilijaš za 2014.godinu

Uslijedila je pauza od 10 minuta.

Prijedlog Odluke o imenovanju člana Općinske izborne komisije Ilijaš

NEDIM MATORUGA – vijećnik SDA (predsjednik Komisije za izbor i imenovanja)

Želim istaći zahvalnost kolegama koji su sa mnom radili na fer i korektnom odnosu u toku samog procesa. Ovoj komisiji je data ingerencija i konkursne komisije koja je imala zadatak da provede konkursnu proceduru za imenovanje člana općinske izborne komisije. U skladu s tim, komisija je zasjedala, mislim tri puta, i zadatak je bio u tri dijela. Prvo, da se napravi lista svih pristiglih prijava po javnom pozivu koji je objavljen u medijima, zatim da se napravi rang-lista svih uspješnih kandidata, a na kraju da se napravi prijedlog odluke o imenovanju člana općinske izborne komisije. U materijalu ste dobili izvještaj o broju pristiglih prijava, a rang-lista uspješnih kandidata i prijedlog odluke ste dobili danas. Izradi rang-liste prethodila je provjera kandidata u smislu ispunjavanja opštih i posebnih uslova propisanih javnim pozivom i Izbornim zakonom, Pravilnikom o imenovanju članova izbornih komisija koji su na snazi. Komisija je provela intervju sa svim kandidatima, uzela u obzir sve činjenice od ispunjavanja svih uslova, od stručnog zvanja, iskustva u radu u struci, pa do općeg dojma vezano za sam intervju. Komisija je napravila rang-listu i to na broju 1. je Senada Hadžimehmedagić, broj 2. Nedžad Masnopita, broj 3. Alija Mašić, broj 4. Mediha Herić i broj 5. Meho Glijiva. Taj izvještaj imate na stolu i u skladu sa tom rang-listom komisija je predložila odluku o imenovanju člana općinske izborne komisije u kojoj je navedeno da član općinske izborne komisije Ilijaš treba da bude Senada Hadžimehmedagić.

ADEM EFENDIĆ – vijećnik SBB

Predsjednik Komisije za izbor i imenovanja je rekao da smo bili članovi Konkursne komisije, a ja znam samo da sam član Komisije za izbor i imenovanja. Drugo, imam amandman ispred KV SBB, a to je da u prijedlogu odluke umjesto Senade Hadžimehmedagić stoji Nedžad Masnopita, zato što je kandidat koji je ispunjavao sve uslove konkursa.

NEDIM MATORUGA - vijećnik SDA (predsjednik Komisije za izbor i imenovanja)

Kao što sam već u uvodnom izlaganju rekao, pet ljudi ispunjava opšte i posebne uslove konkursa i to je komisija zaključila u tu nema dileme. Želim naglasiti da je u međuvremeno bilo izmjena Izbornog zakona BiH gdje se decidno kaže da se član 2. stav 4. Izbornog zakona mijenja i glasi: "U sastavu općinske izborne komisije i biračkog odbora obezbjedit će se da broj članova manje zastupljenog pola bude 40% od ukupnog broja članova". To je jedna od činjenica koje smo morali uzeti u obzir, pored kvalifikacija, radnog iskustva i svega onog što sam rekao. Dakle, svih pet kandidata ispunjava formalno-pravne uslove, ali ovo je stvar koju definitivno moramo uzeti u obzir, jer predlaganje nekog ko narušava ovaj član zakona je samo suprotnost sa zakonom i u tom smislu mislim da je ovaj amandman kolega Efendiću u koliziji sa članom 2.2. stav 4. Izbornog zakona.

ILDA KAHRIMAN – sekretar Općinskog vijeća

Ovo što je iznio predsjednik Komisije za izbor i imenovanja je uredu, a ja sam dobila potvrdu od Centralne izborne komisije BiH, odnosno od referata općinske izborne komisije da se mora poštovati spolna zastupljenost.

NIJAZ MAŠIĆ – vijećnik SBB

Puno je propusta napravljeno (da se odmah nakon 30 dana imenuje član općinske izborne komisije, nakon što je tadašnji član "preselio"), a niko ne odgovara (ni predsjedavajući, ni sekretar, ni načelnik, ni kolegij). Drugo, poslije oktobarskih izbora biramo preostala dva člana i imat ćemo mogućnost da i nacionalno zastupimo i polno. Meni je žao što je Komisija za izbor i imenovanja (niti jedan član kompetentan), jer su jako stručniji bili kandidati od same komisije. Trebali smo imati predloženu stručnu komisiju kao što su ljudi koji su prolazili kroz izbore (notar, advokat, predsjednik općinske izborne komisije). Odgovorno tvrdim da ne narušavamo ako bude muški pol izabran, jer ćemo za par mjeseci imati priliku da to ispravimo. Druga stvar, ova predložena osoba, ako nije bila u izbornom procesu, ne može ni rangirati, a to će vjerovatno druge stranke na sudu tražiti. Kaže se "izuzetno", a to važi ako se niko nije javio.

NEDIM MATORUGA - vijećnik SDA (predsjednik Komisije za izbor i imenovanja)

Kolega Mašiću rekli ste da su prekršene pravila zakona. Navedite nam šta je tačno prekršeno, a ja ću u skladu sa svojim znanjem i uvjerenjem reći da ovo što vi kažete je neistina. Izborni zakon je jasan, a izmjene smo imali u proteklih godinu dana, a prije toga smo imali mandat komisije koji je trajao. Nigdje ovdje, niti u prelaznim odredbama se ne kaže da ove stvari ne vrijede za aktuelno stanje u slučaju popunjavanja izborne komisije. Dakle, Izborni zakon kaže: "U sastavu općinske izborne komisije i biračkog odbora obezbjedit će se da broj članova manje zastupljenog pola bude 40% od ukupnog broja članova".

U Izbornom zakonu BiH u poglavlju 2. u članu 2.2. stav 4. se mijenja i glasi: "U sastavu općinske izborne komisije i biračkog odbora obezbjedit će se da broj članova manje zastupljenog pola bude 40% od ukupnog broja članova". Ovaj član je izmjenjen i više nije riječ "nastojat će se", nego riječ "obezbjedit će se".

SELVER HERIĆ – vijećnik SDP

Shodno plenumima i revoluciji, treba da se očitujemo i prednost damo nekome ko je na birou i ne radi. Bez obzira što jedan kandidat nosi moje prezime, nismo iste političke opcije i znam sigurno da za mene neće glasati na izborima, ali mislim da je zaslužila da bude član općinske izborne komisije, diplomirani je pravnik i na birou. Koliko imam saznanja i gospođa Senada nije zaposlena i ja poštujem izbor Komisije. Komisija se sigurno nije očitovala onako kako bi svi htjeli. Nažalost, dopunit ću se na izlaganje profesora, da je komisija vršila intervju sa magistrima, pravnicima, politolozima, a neka je na čast političarima što nisu imali sluha da u ovu komisiju izaberu stručne osobe.

MAHIR DEVIĆ – zamjenik predsjedavajućeg

Amandman KV SBB-a je u suprotnosti sa već ranije navedenim članom zakona, te ga ja iz tog razloga ne mogu dati na glasanje. Ko želi tu vrstu odgovornosti preuzeti na sebe nakon tumačenja sekretara, neka izvoli. Evo predsjedavajući OV-a je tu, pa neka on uradi ono što misli da treba. Zakon je vrlo jasan. Diskusiju kolege Herića podržavam i ja bih lično volio da je komisija predložila Medihu Herić, a također želim naglasiti da Senada nije politički prijedlog. Tri kandidata su bila kandidati iz SDA i mi se ovdje nismo odnosili striktno politički.

Ja, kao čovjek koji vodi sjednicu, mogu dati na glasanje prijedlog komisije, a predsjedavajući ako želi neka nastavi voditi sjednicu.

Na zahtjev predsjedavajućeg Damira Filipovića uslijedila je pauza od deset minuta.

Nakon pauze za riječ se javio

ALAN ŠERAK – vijećnik SDP-a

Neke stvari predsjednik Komisije je zaboravio da napomene kada je u pitanju cijela priča oko odabira kandidata. Sam odnos glasanja je bio po starom ustaljenom principu tipa preglasavanja. Ono što mi je drago, da je Alan Šerak kao ličnost i pojedinac, u cijeloj ovoj situaciji bio profesionalac i bio konkretan, korektan i pošten kada je ocjenjivao kandidate. Ne mogu da shvatim, a prije svega, da dva člana komisije, postave pitanje "da li radiš" i to su bila jedina pitanja jednom kandidatu. Kada smo ocjenjivali i vršili konačnu listu, obrazloženje jednog od članova komisije je bilo da se na prvom mjestu nalazi ta i ta osoba iz jednog jedinog razloga – nije u radnom odnosu, na drugo mjesto stavljam osobu i obrazlaže zašto je na drugom mjestu – zato što ga poznajem trideset godina. Kompetencije tipa radnog iskustva – ne važe, kompetencije tipa stručne spreme – ne važe, kompetencije tipa poznaje li zakon na intervjuu i da li je odgovarao tačno na određena pitanja, kaže nije tačno i to me ne interesuje. E to je bilo na Komisiji za izbor i imenovanje. Na četvrto i peto mjesto stavlja ljude koji ne rade. Ako je princip jedan, troje ih ne radi.

NEDIM MATORUGA - vijećnik SDA (predsjednik Komisije za izbor i imenovanja)

Obzirom da je kolega Šerak uputio direktno neke stvari vezano za rad komisije, ja ću reći da komisija nije obavezna da prezentira sam brojčani rezultat glasanja, jer je odluka komisije onakva kakva jeste, bez obzira da li je odnos glasanja 3:2, 4:1 ili 5:0. To, da li je neko u komisiji postavio neko pitanje ili nije, to je njegova stvar. Član komisije ima pravo da postavi ono što ga interesuje i član komisije treba da kreira svoju odluku na osnovu kompletnog ishoda intervjua i ne samo na osnovu svojih pitanja, nego na osnovu svih pitanja. Što se tiče obrazloženja nekih ljudi da neko nekog poznaje, pa bilo je i obrazloženja "obećao sam čovjeku i ne mogu drugačije", ali ovo nije stvar koja se ovdje iznosi. Komisija je završila svoj posao i mislim da je to uradila korektno i već na početku sam se zahvalio članovima komisije na korektnom radu. Neformalne stvari neću ovdje iznositi, jer nije ni mjesto ni vrijeme, ali ono na što ću apelovati jeste da uzmete u obzir odluku komisije, jer nije donesena paušalno i nije politička odluka.

MAHIR DEVIĆ – zamjenik predsjedavajućeg

Zamolio bih kolege vijećnike da ne odemo u ono što se zove stara tradicija općinskog vijeća u imena ljudi i da ih bagatelišemo. Pričamo o vrlo ozbiljnim ljudima. Mi možemo imati vrlo različite političke stavove, možemo drugačije misliti, ali hoću da kažem da imamo akt koji ne trebamo bagatelisati, pogotovo što je u pitanju ime i prezime osobe koja je:

1. najmanje politička
2. diplomirani pravnik – magistar prava
3. 12-13 godina radnog iskustva
4. prvorangirana je na listi
5. zakon je rekao da treba da bude žensko.

Zamolio bih Vas kolega Šerak da ne idemo dalje u repliciranje jedni drugima oko ovoga, jer zaista nema smisla.

ADEM EFENDIĆ – vijećnik SBB-a

Dopredsjedavajući, ja neću pričati o imenima, a za mene je danas zakon Statut i Poslovnik i tražim od vas kao član općinskog vijeća i predsjednik Kluba vijećnika SBB-a da stavite moj amandman na glasanje i da se o njemu izjašnjavate. Amandman sam podnio u predviđenom roku.

MAHIR DEVIĆ – zamjenik predsjedavajućeg

Zaključujem raspravu po ovoj tački dnevnog reda, odbijam Vaš amandman, kao čovjek koji vodi ovu sjednicu, neću ga staviti na glasanje jer je u suprotnosti sa vrlo jasnim i eksplicitnim odredbama Izbornog zakona BiH. Radi transparentnosti rada ovog Vijeća predložio sam, ukoliko želi predsjedavajući OV-a, jer je bolestan, da preuzme tu vrstu odgovornosti na sebe, ali je i on to odbio.

Prema tome, dajem na glasanje prijedlog odluke Komisije za izbor imenovanja, a vama ostavljam mogućnost da me tužite.

Općinsko vijeće je glasalo, ali je izražena sumnja u glasanje i zatraženo pojedinačno glasanje.

ZA su glasali slijedeći vijećnici: Mahir Dević, Nedim Matoruga, Saudin Durmić, Halid Dizdarević, Amar Dovadžija, Muamer Dervišević, Fahir Hasanović, Rasim Šehić, Selma Pušina, Marioneta Ilić-Jureta, Selver Herić, Edhem Hasanović, Asim Mujić, Nihad Bučuk, Muhamed Handžić i Enes Dizdarević.

UZDRŽANI su bili slijedeći vijećnici: Alan Šerak, Damir Filipović, Adem Efendić, Sead Šehić, Akif Bešlija, Besim Gljiva, Aida Mališević i Nijaz Rastoder.

Odsutan vijećnik Nijaz Mašić.

Konstatovano je da je sa 16 glasova ZA i 8 UZDRŽANIH Općinsko vijeće donijelo

Odluku o imenovanju člana Općinske izborne komisije Ilijaš

AD-6

Izvještaj o poslovanju JKP "Vodostan" d.o.o. Ilijaš za 2013. godinu

SAUDIN MEŠETOVIĆ – direktor JKP "Vodostan" d.o.o. Ilijaš

Izvještaj je detaljan i opširan. Godina 2013. je bila samo nastavak sušne godine iz 2012. sa evidentnim deficitom vode u zemlji. Mi smo prošlu godinu prebrodili, imali smo određenih hidroloških pogodnosti, a prebrodili smo je, zahvaljujući i tome što smo u 2012.godini betonirali procjep ispod Selačkog mosta. Što se tiče finansijskih rezultata i efekata vidjeli ste u izvještaju da smo uspjeli blago sniziti troškove na svim pozicijama. Uspjeli smo smanjiti i gubitak. Preduzeće je na pozitivnoj nuli, nikome nismo dužni i svoje obaveze odmah izmirujemo prema dobavljačima.

Svu svoju pažnju i energiju moramo usredsrediti na period kada nemamo vode. Potrebno je aktivirati jedan ozbiljan problem na traženju novih vodnih resursa.

Pored svih problema, nama je sada problem kako održati preduzeće na "nogama" pod uslovima da se može raditi makar prosta reprodukcija. Preduzeće ekonomski nije samoodrživo. Kako stvari stoje, potpora kantona će izostati i vrlo brzo ćemo se suočiti sa tim problemima.

Sud je aktivirao tužbe i one iznose cca 1.800.000 KM prema stanovništvu, a ukupna naša potraživanja po osnovu komunalne usluge su preko dva miliona KM. Skrenuo bih pažnju na jednu stvar, a to je da imamo ljudi koji su u vrlo teškoj materijalno-finansijskoj situaciji i o tome bi trebalo povesti računa. Možda uvesti određene subvencije kada su u pitanju komunalne usluge.

BESIM GLJIVA – vijećnik Stranke za Srednje

Zahvalio se direktoru na iscrpnom izvještavanju, te naglasio da je vodovod Vrela sa najviše priključaka, kapacitetom i specifičnošću i svim ostalim poslije ovog ilijaškog vodovoda. To je vodovod koji ima primarni vod u dužini cca 30 km i napaja se prirodnim padom i to je vodovod koji nije pripojen JKP Vodostan i koji se jedva održava uz blagu pomoć općine i Vodostana uz plaćanje struje za taj vodovod. Zamolio bih da u skorije vrijeme krenemo u analizu ovog vodovoda i da se vidi koja je to mogućnost da se ovaj vodovod pripoji JKP Vodostan. Trenutno se to održava tako što angažujemo dva lica koja nekada platimo, nekada ne platimo, a znate kako je teško izvršiti naplatu, jer nema mehanizama da se to uradi.

SELVER HERIĆ – vijećnik SDP-a

Ovako paušalan i tempiran izvještaj ja ne smijem prihvatiti, a da se ne javim za koju riječ. Shodno odbijanju od strane direktora, činjenice koje su se dešavale na gornjem kraju u vezi nezakonitih radnji, misleći da ja nisam upravu, ja sam izazvan i moram reagovati i nastupam kao neki protivnik, ali ja to nisam i želim dobro preduzeću i radnicima. U ovom izvještaju nigdje nije dotaknuto shodno onom što smo mi u vijećničkim pitanjima iznosili (od uposlenika, strukture, ko tamo radi, šta radi, ko ne radi, ima li viška radnika). Moram vam reći da morate vladati situacijom. U nekim odgovorima ste mi pisali da je to radila MZ-a Nišići, a moram vas obavjestiti da MZ Nišići ne postoji već 10 godina, da jednom znate strukturu MZ-a. Kada ste spominjali sud i naplatu suda razočaran sam da su pojedinci koji nemaju tu vodu dobili pozive suda i dužničke liste, pa prema tome ni taj podatak vam nije adekvatan. Kada je riječ o MZ-i Srednje, mi smo u Podružnici D.Čevljanovići dogovorili da uvedemo mjerne instrumente za potrošnju vode, te vas stoga pozivam da u dogovoru, ako ja tu budem ili moj nasljednik, zajedno i taj posao odradite kako bi gornja strana napokon imala vodu, a koju nemaju otkako ste vi došli i uzurpirali taj vodovod. Kada je dug vode u pitanju (dugovi firmi me posebno interesuje) mislim da ne smijete dozvoliti da jedna privatna firma duguje 10-15 hiljada KM. Dovodite me u sumnju da ste vi u talu sa nekim. Lako je presjeći vodu privatnoj firmi, odstraniti je sa vodovodne mreže, ali vi to ne radite i on je i dalje korisnik vode, a ništa mu se ne naplaćuje. Nigdje u izvještaju niste naveli radnje koje nisu dobre za tu, kako ste naveli, pozitivnu nulu. Primjera radi, imate pet vozila, a nigdje niste naveli da se ta vozila koriste kao privatna vozila, počev od vas pa dalje. Kada je u pitanju zaposlenost radnika, vidim da tamo ima povlaštenih, a sve ovo što ću danas reći to nisam ja izmislio, nego sam dobio od poštenih radnika u ovom preduzeću koji gledaju nepoštenje i ne slažu sa istim. Imate tri radnika na stanici Karašnica koji zadnjih deset godina nisu radili do kraja radnog vremena. Imate rezervnog mašinistu na

tom mjestu koji služi za zamjenu na godišnjim odmorima, a držite ga cijelu godinu i kažete da nemate viška radnika. Negdje ste naveli da konstantno električar vrši nadzor nad vodovodom i tim postrojenjima, a ja imam informaciju da električar u posljednja dva mjeseca radi striktno za vaše potrebe, potrebe vaše kuće i vikendice vaše saputnice. Sve ovo su navodi radnika kojima ste vi direktor.

ADEM EFENDIĆ – vijećnik SBB-a

Kroz mnoge odgovore i upozorenja od strane direktora Vodostana evidentno je da ćemo u skorije vrijeme oskudijevati sa vodom i o tome mi trebamo povesti računa. Mi u Klubu SBB-a ne možemo podržati izvještaj čiji su gubici u hiljadama i desetinama hiljada, ali čestitam i direktoru, jer i njemu je teško izdržati sa ljudima koji su članovi skupštine iz političkih partija i možda bi on uspješnije radio da mu nije nametanja politike.

SAUDIN MEŠETOVIĆ – direktor JKP "Vodostan" d.o.o. Ilijaš

Ja se nikada nisam bojao istine. Ovo sve što ti govoriš Selvere je lično. Transformacijom mjesnih zajednica Nišići su pripali Srednjem, ali oni su uveli taksu i oni su naplaćivali, a nađi dokaz da sam ja naplaćivao.

Paušali za priključak – imamo tri slučaja kako su tužbe nastupile i oni imaju priključke na šahtu, ali kažu da ne koriste tu vodu. Zatražio sam da daju izjave, a onda da se isključe na glavnom priključku.

Kada su u pitanju vodomjeri – i vi gore trebate kupite vodomjere, a od nas ćete dobiti projekat.

Kada je u pitanju Povoča, iz Srednjeg se može vršiti napajanje vodom.

Imamo pet vozila, a takođe postoji i pasivna dežura, kod nas nema radnog vremena, kada je kvar u pitanju ne pitamo koliko je sati, nego se ide odmah otklanjati kvar.

SELVER HERIĆ – vijećnik SDP-a

Kada sam pominjao vozila, pasivna dežura nije nikada za pet vozila, jer svih pet vozila se vozi kući za privatne potrebe. Ja ovo vama direktore govorim da imate bolji i veći nadzor i da ne vjerujete suradnicima. Ja ništa lično nemam protiv vas. Znači, želim da imate veći nadzor nad radnicima i nemojte da vas lažu. Rad poslovođe neću ni pominjati, a radnici kažu da kada on primi platu, na posao ga nema po deset dana, a to je vaša odgovornost. Protiv vas nemam ništa, samo vas kritikujem što nemate nadzor nad pojedincima.

MUHAMED HANDŽIĆ – vijećnik BPS-Sefer Halilović

Imam jedno pitanje za direktora. Naime, rekli ste da na Nišićima niste naplaćivali priključke za vodu, pa pitam zašto se u Bioči vršila naplata od 250-500 KM po jednom priključku za vodovod iako vi niste gradili taj vodovod. Dakle, pitanje je zbog čega u Bioči naplaćujete priključke, a na Nišićima ne.

Drugo pitanje ili konstatacija, način upravljanja sa dva vodovoda u Bioči, dva vodovoda koriste cca 120 domaćinstava, i o vodovodima niko ne brine. Dakle, kako ćemo ih odražavati, vršiti naplatu i sve ostalo što tretira zakon?

Treće, kada je u pitanju naplata dugova, ja predlažem da se vi ugradite u okvire zakona i zakonitosti, a što se tiče socijale postoji služba za socijalnu zaštitu i sve službe do državnog nivoa i neka oni tretiraju svako osobno, a ja svoj dug plaćam na vrijeme.

SAUDIN MEŠETOVIĆ – direktor JKP "Vodostan" d.o.o. Ilijaš

Samo da pojasnim ovo što je vijećnik Handžić pitao vezano za naplatu priključaka, jer se očito nismo razumjeli. Radi se o priključnoj taksi isto kako je uvela Crna Rijeka i to i jeste vodovod koji je građen samodprinosom građana i prije rada su kazali da je priključak hiljadu i nešto KM, a onda im se naplaćivalo ovo kao i kod vas.

Diskutanata po ovoj tački dnevnog reda više nije bilo, pa je OV-e sa

17 glasova ZA i 3 UZDRŽANA usvojilo

Izveštaj o poslovanju JKP "Vodostan" d.o.o. Ilijaš za 2013. godinu

AD7

Prijedlog rješenja iz imovinsko-pravne oblasti:

- a) rješenje broj:06/1-31-603/14/HM
- f) rješenje broj:06/1-31-1162/14/HM
- g) rješenje broj:06/1-31-1163/14/EH

Diskutanata po ovoj tački dnevnog reda nije bilo, pa je OV-e jednoglasno donijelo

Rješenja iz imovinsko-pravne oblasti:

- a) rješenje broj:06/1-31-603/14/HM
- f) rješenje broj:06/1-31-1162/14/HM
- g) rješenje broj:06/1-31-1163/14/EH

Uslijedila je pauza od pet minuta.

AD-8

Informacija u oblasti zdravstva na području općine Ilijaš

SANJA ZAGORAC-JOZIĆ – pomoćnik načelnika

Ovo je redovna programska tačka. Na tematskoj sjednici smo donijeli niz zaključaka koje smo prosljedili svim relevantnim, ali nažalost do danas nismo niti jedan odgovor dobili po pitanju realizacije zaključaka. Međutim, moram reći da mi malim, ali velikim koracima za naše građane, pravimo napretke u oblasti zdravstvene zaštite. Na tragu smo otvaraja RTG kabineta. Progresivno razmišljamo da ćemo uspjeti nadzidati dva sprata i u roku od dvije godine izvršiti opremanje.

SENA SOFTIĆ-TALJANOVIĆ - direktorica Zavoda za hitnu medicinsku pomoć

Što se tiče rada hitne medicinske pomoći dobili ste u materijalima. Do sada smo vas izvještavali kako to radi hitna medicinska pomoć tokom noći u Ilijašu. Ima nekih pomaka u vašim inicijativama koje traju decenijama, ali evo mozaik se konačno sklopio i dolazim sa lijepim informacijama po građane općine Ilijaš, a to je da ćemo vrlo brzo potpisati ugovor sa Zavodom zdravstvenog osiguranja i otvoriti 24-satni rad hitne pomoći u općini Ilijaš. Do ovog cilja se kretalo jako sporo, ali nije bilo ni do nas, a niti do lokalne zajednice. Problem su uvijek bila novčana sredstva.

dr.NIJAZ ŠTITKOVAC – direktor JU “Dom zdravlja” Ilijaš

Ovo što je iznijela direktorica Zavoda za hitnu medicinsku pomoć je lijepa vijest i za Dom zdravlja Ilijaš tako da ćemo mi u porodičnoj medicini dobiti više prostora da se bavimo onim što podrazumijeva porodična medicina.

Želim reći da smo kadrovski sa brojem ljekara na istom nivou kao i prošle godine. Trenutno imamo jedanaest ljekara, od toga je deset sa punim radnim vremenom i jedan ljekar je na 4h zbog zakonskog prava po osnovu rođenja trećeg djeteta.

Uspostavljena je informatizacija u vođenju evidencija i završena je u centralnom objektu, a još ostaje da se završi u lokalitetima. Ovo će biti veliki pomak, ali nam trenutno stvara određene probleme, jer se radi i pisana i elektronska evidencija, ali kada se to sve posloži, to će olakšati rad. U martu je započeta adaptacija kabineta za radiologiju i pulmologiju u kojem je općina sudjelovala sa svojim sredstvima. Raduje me i što je tender za RTG aparat ponovo raspisan i dobio sam uvjerenja da neće biti više onih problema kao ranije (žalbe i ostalo). Nabavku rentgena očekujem u maju. U proteklom periodu me mučilo jedno vijećničko pitanje, a odnosilo se na zaključak sa sjednice iz novembra, a to je zašto ne radi druga smjena u Srednjem, jer je zaključak Vijeća bio takav. Mislim da smo nekako olako prihvatili ovaj zaključak, a u odgovoru sam pokušao da vam objasnim o čemu se tačno radi i nadam se da ćete shvatiti funkcionisanje porodične medicine sa deset ljekara. Ako finansijer odobri prijem jednog tima za drugu smjenu, ja sam za to, ali u ovim okolnostima to nije moguće. U vrijeme godišnjih odmora imat ćemo problema.

Ja sam predložio da radna bude prva subota u mjesecu u Srednjem, s tim što bi se radno vrijeme u radnim danima odvijalo do 14h.

SELMA PUŠINA – vijećnica SDA

Što se tiče ambulate Mrakovo, meni je nevjerovatno da tamo ima 3500 stanovnika, a samo 270 zdravstvenih kartona. Na koji način vi možete uticati na građane da prenesu svoje kartone iz centralnog objekta u ambulantu Mrakovo? Ja sam razgovarala sa građanima i oni kažu da je razlog što nema apoteke u Mrakovu.

dr.NIJAZ ŠTITKOVAC – direktor JU “Dom zdravlja” Ilijaš

Prvi razlog je prava pacijenata na izbor ljekara.

Drugi je, nedostatak apoteke, ali to nije naš posao. Tu bi se možda trebala angažovati i lokalna zajednica na neki način.

Mi smo bili prenijeli određeni broj kartona u Mrakovo, ali građani su ponovo vratili svoje kartone u centralni objekat.

Želim vas obavjestiti da specijalističko-konsultativna služba na nivou JU Dom zdravlja Kantona Sarajevo prerasla je u zasebnu organizacionu jedinicu, znači zasebnu jedinicu. Znači, kada se u pitanju žalbe na internistu, oftamologa, ORL, sve žalbe i pohvale usmjeravati prema direktoru ove organizacione jedinice.

AKIF BEŠLIJA – vijećnik SBB-a

Obzirom da dolazim iz Mrakova i situacija je takva kakva jeste, ljekar radi tri dana u sedmici i to do 11h. Ja bih volio da se mogu opredjeliti za tog ljekara, a ne za njih 3-4 koji se mijenjaju. U tome nastaje suština probleme, jer se ne mogu opredjeliti za ljekara porodične medicine. Moj zdravstveni karton je u Mrakovu, ali šta uraditi kada ona dva dana kada ljekar ne radi u Mrakovu, a ja moram ljekaru (da li će me doktor primiti u

centralnom objektu)? Drugo, znate da je u zdravstvenom kartonu historija bolesti za pacijena i šta ako je neko npr. alergičan na nešto, a ljekar ga primi, a karton mu je u Mrakovu ?

dr.NIJAZ ŠTITKOVAC – direktor JU “Dom zdravlja” Ilijaš

Taj problem je očigledan i nemam neko 100% rješenje. Pitanje zašto ljekar radi do 11h u Mrakovu, pa od jedanaest doktora koje imamo, deset radi puno radno vrijeme, a jedan pola radnog vremena i tog ljekara koristimo za Kamenicu, Gajeve i Mrakovo. Kada taj doktor počne raditi puno radno vrijeme, radit će puno radno vrijeme na lokalitetima gdje sada radi manje.

Nastojat ćemo da jedan te isti ljekar dolazi u Mrakovo.

Volio bih da se apoteka otvori u Mrakovu, jer i to bi stimulisalo ljude da prenesu svoje kartone.

SELVER HERIĆ – vijećnik SDP-a

Želim reći da moramo biti zadovoljni ovim što ste predložili, a vezano za ambulantu Srednje, ali vas molim da ubuduće radite na tome ka bi smo svi zajedno izdejstvovali minimalne potrebe stanovništva tog gornjeg područja. Takođe, zamolio bih predstavnicu “Apoteke Sarajevo”, da ne dozvolite ove godine da se u vrijeme godišnjih odmora apoteka u Srednjem zatvori. Zadnji put nam je to obećano ovdje.

dr.NIJAZ ŠTITKOVAC – direktor JU “Dom zdravlja” Ilijaš

Mi ćemo se svakako truditi da se poboljša zdravstvena zaštita u Srednjem. Pravo na godišnje odmore ljudi imaju, tako da smo u toku godine uvijek bez jednog ljekara i to razumijete.

Što se tiče pitanje kako će ljekar znati da je neko alergičan na nešto, želim reći da će ovaj elektronski sistem to omogućiti.

NIJAZ RASTODER – vijećnik LDS-a

Interesuje me kadrovska politika tehničkog osoblja, a znamo da vi niste odgovorni za prijem uposlenika, ali zbog građanstva vas moram pitati. Da li je istina da vama pošalju nekog tehničara, pa onda vi nemate gdje sa njim i onda ga postavite na recepciju gdje se stvori opšta gužva ? Takođe je slučaj i sa sestrama, laborantima itd. Da li je to istina ?

dr.NIJAZ ŠTITKOVAC – direktor JU “Dom zdravlja” Ilijaš

Dosadašnji internista će preći u Novi Grad, a ovdje će biti novi. Što se tiče prijema kadrova, ja nisam ovlašten ni da ih primam niti da ih otpuštam. Što se tiče recepcije je pokrivena baš onako kako treba.

ADEM EFENDIĆ – vijećnik SBB-a

Želim samo reći da bolest ne bira kada će neko otići na godišnji odmor i da ga sačeka kada će se on vratiti. To jesu problemi, ali nastojte da se to prevaziđe. Nemojte dozvoliti da se kroz izvještaj provlači da je neko na godišnjem, bolovanju, specijalizaciji itd.

dr.NIJAZ ŠTITKOVAČ – direktor JU “Dom zdravlja” Ilijaš

Godišnje odmore spominjem, ali to je činjenica koja nas muči, međutim svi pacijenti će biti primljeni bez obzira što su njihovi ljekari na godišnjem odmoru. U Podlugovima trebaju tri tima, ali dođe elaborat da nije potrebno.

RASIM ŠEHIĆ – vijećnik SDA

U prethodnih pet godina ja i kolega Selver smo pokretali inicijative i slali pitanja, vezano za gornji kraj općine. Na ovom fonu, želim obratiti pažnju na apoteku i ambulantu u Srednjem (u izvještaju je navedeno koliko recepata je izdato u Ilijašu, a koliko u Srednjem). Apelujem da apoteka u Srednjem ne treba biti zatvorena za vrijeme godišnjih odmora.

FIKRETA SALIHOVIĆ – predstavnik JU “Apoteke Sarajevo”

JU “Apoteke Sarajevo” ima dva objekta: u Ilijašu koja radi 24h i apoteka u Srednjem. Apoteka u Srednjem više nikada neće biti zatvorena za vrijeme godišnjih odmora. Nadam se da su ljudi zadovoljni našom uslugom, našim znanjem i kvalitetom. Što se tiče apoteke u Mrakovu, naša ustanova ima velike ambicije i želje da pokrije taj prostor u Mrakovu, tj. da se otvori apoteka.

MAHIR DEVIĆ – zamjenik predsjedavajućeg

Komisija za zdravstvo, informisanje, socijalna i vjerska pitanja je imala sjednicu i predložili zaključke ili preporuke i to:

1. Da Općinsko vijeće Ilijaš uputi prijedlog Ministarstvu Kantona Sarajevo da u ambulantama omogući usluge protetike.
2. Da se uputi zahtjev JU Zavod za zaštitu žena i materinstva za organizovanje predavanja vezano za zaštitu zdravlja žena, majki na području Srednjeg i Kamenice.

Ne znam koliko su zaključci u skladu sa našim mogućnostima.

Informaciju ćemo primiti k znanju, a ove zaključke u formi inicijativa uputiti nadležnim institucijama.

Diskutanata po ovoj tački dnevno reda više nije bilo, pa je OV-e primilo k znanju

Informaciju u oblasti zdravstva na području općine Ilijaš

uz gore navedene inicijative.

AD-9

Izvještaj o radu Komisije za provođenje izbora u mjesnim zajednicama
na području općine Ilijaš

MAHIR DEVIĆ – zamjenik predsjedavajućeg

Ovaj materijale smo dobili kao dopunu dnevnog reda.

Može se reći da su ovi izbori protekli, u najvećem dijelu, vrlo korektno, ali činjenica je da

smo imali u dva biračka mjesta prigovore koji su išli prema komisiji koja je provodila izbore i ne vidim da je po tom pitanju nešto posebno urađeno. Bilo je manjih incidenata na terenu od strane općinskih vijećnika koji su "vukli" ljude za rukave i na sve moguće načine pokušali da im sugeriraju za koga će glasati, a to je posebno bilo izraženo u MZ Ilijaš Grad. Naravno, mi ne možemo uticati na karakter vijećnika i na to da se pojedini vijećnici spuste na nivo posmatrača, prije svega, a onda posmatrači umjesto da budu na mjestu posmatrača, oni napuste biračko mjesto i izađu i sugeriraju biračima za koga glasati. Mislim da to ide na čast vijećnicima i ne trebaju da degradiraju općinske vijećnike na ovaj način. Ovo treba da bude ozbiljan organ, bez obzira što u tom organu ima neozbiljnih vijećnika i to se pokazuje iz sjednice u sjednicu. Pozivam komisiju da nas informiše o tome da li je bilo ovih situacija i podnese izvještaj, kao i nekoliko rečenica od strane koordinатора za poslove sa mjesnim zajednicama i da onda zauzmemo određene zaključke i da ovo privredemo kraju. Ne treba stavljati nikakve mrlje na bilo čiju pobjedu i treba čestitati svim kandidatima koji su pobijedili, a vezano za ove dvije mjesne zajednice gdje su uloženi prigovori, treba usvojiti određene zaključke da se to završi i da se izvještaj može kompletno usvojiti.

Ovaj materijal nije razmatrala Komisija za statut i propise, jer smo ga dobili jutros, ali to nas ne spriječava da radimo na ovoj tački dnevnog reda i usvojimo određene zaključke.

MIDHAT ČEHO – koordinatore za rad sa mjesnim zajednicama

Na ove izbore je izašlo cca 6000 stanovnika i ja to smatram velikim uspjehom. Kada je u pitanju odnos svih sudionika i aktera u ovom izbornom procesu, lično mislim da je amandman koji je, čini mi se, uložio SBB doveo do određenih problema iz razloga što tumačenje nije bilo adekvatno u prvom mahu, a onda smo počeli da ga primjenjujemo. Iz tog razloga komisija nije predviđela aplikacije koje bi, eventulano, otklonile sve teškoće koje su se pojavile i koje smo prevazišli. Odgovorno tvrdim, kao profesionalno lice, da su izbori provedeni fer i korektno. Izborni proces nije bio narušen, niti je bilo "podvala". Ukoliko imate određene sumnje, korektno bi bilo da to javno kažete, a sugrišem vam da budete ozbiljni i savjesni.

Ne bih komentarisao šta je radio uvaženi vijećnik Rastoder. Vjerovatno je on napravio takvu procjenu pa nije bio na biračkom mjestu, ali je radio na svoj način. To mi nismo znali, jesmo to razmatrali i donijeli smo takvu odluku kakvu smo donijeli.

Svima vam se zahvaljujem što ste me saslušali i želim da nastavak ove tačke prođe u duhu jedne kvalitetne i korisne analize.

KERIM MUMINOVIĆ – član Komisije za provođenje izbora u mjesnim zajednicama

Ovo Vijeće je vjerovatno imalo priliku da dobije informaciju o stanju i uslovima u mjesnim zajednicama na području općine Ilijaš. Stanje je bilo dosta loše, bojkot rada pojedinih predsjednika savjeta mjesnih zajednica itd. Ovo je samo uvod u ovo što dolazi. Na sve ovo su došli izbori u mjesnim zajednicama koji su, po meni, provedeni u skladu sa zakonom i procedurama koje je propisalo Općinsko vijeće i statut mjesnih zajednica. To su dva ključna dokumenta, ne po mom viđenju stvari, nego po izjavi CIK-a BiH koju smo tražili. Ponavljam još jednom, Odluka Općinskog vijeća, Statut općine i Statut MZ-e su ključni dokumenti koji su regulisali rad komisije. To je pravni okvir u kojem smo radili. Ne želim niti jednoj političkoj stranci da dijelim lekcije, niti njenim članovima, ali zbog nepoznavanja Izbornog zakona pojedinaca, želim reći da je glasačko mjesto 50 m od ulaza u zgradu i posmatrač ima pravo da izađe u tom krugu da posmatra, ali nema pravo da lobira i ubjeđuje glasače.

Materijale ste dobili i ne znam koliko ste uspjeli sve pročitati, pa ću taksativno navesti sa čime se komisija suočila i koji su problemi u radu bili.

Prva činjenica je da je predsjednik komisije i zamjenik predsjednika podnijeli ostavke, poslije prihvatanja kandidature na ovim izborima tako da je komisija ostala sa tri člana. Poslovnikom o radu Općinskog vijeća je regulisano da komisija može raditi ako je prisutna većina članova komisije, odluke su punovažne ako su ih donijela sva tri člana komisije. Što se tiče rada komisije, imali smo nefer i nekorektnih odnosa u samoj komisiji, dok je bila u punom sastavu. Snimanje pojedinih dokumenata, upućivanje u neke centre van rada komisije, dopisivanje podataka na dokumentima sa kojima je komisija radila, znači, imali smo neki kao "unutrašnji rat" ali eto ostali smo u normalnom kursu, ne stavljajući se na ničiju stranu, isključivo poštujući zakone. Bilo je primjedbi, posebno na član 5., stav 3. Odluke općinskog vijeća o provođenju izbora, jer tamo nije decidno rečeno da li je žrijebanje javno ili tajno. Zbog situacije sa kojom smo bili pritisnuti kao komisija, imali smo jako malo vremena. Nismo imali vremena da propišemo tipske dokumente, da se u MZ izvrše kandidature, pa su nam ljudi dostavljali na komadu papira ime, prezime, bez matičnog broja, što je nama otežavalo rad, jer je trebalo provjeriti sve te podatke, da li neko može da se kandiduje, da li ga ima u izvodu iz centralnog biračkog spiska, znači, imali smo masu problema.

Član 5., stav 3. nam je doprinjeo da smo imali 7 žalbi, razgovora sa ljudima, da bi se dokazalo da smo mi ljudi koji rade u skladu sa zakonom, javno, transparentno, da ne pripadamo nikakvoj "kuhinji", da u svako doba, ako nam vrijeme dopušta smo na raspolaganju svima.

Što se tiče statističkih podataka, mogu vam samo reći da je 32.05% je izlaz. Kompletna statistika koju smo podnijeli u izvještaju nije završena do kraja, iz razloga žalbi na biračkom mjestu Kamenica i Ilijaš Grad. Znam da je bilo puno spekulacija o tome, ali vam mogu odgovorno reći da smo sve radili u skladu sa zakonom. Mi kao prvostepena komisija nismo pravnici, nismo na osnovu poznavanja zakona bili u stanju meritorno odluku da donesemo, da ne bi pogriješili, da ne bi bilo da smo na nečijoj strani i zato smo kandidate uputili da se žale drugostepenoj komisiji i to je njihovo pravo. Izborni zakon BiH kaže da se na izborima ima pravo da se bilo ko žali po određenim zakonskim uslovima. Znači, Izborna komisija daje odgovor, ako je neko nezadovoljan ima apelacioni sud, a obzirom da općina nema suda ni apelacionog suda, onda to treba da riješi drugostepena komisija. Cilj je da bude sve kako treba, bez ikakvog političkog uticaja i smanjivanja tenzija.

U setu prijedloga koje je komisija uputila ovom Vijeću dali smo sebi za pravo da predložimo izmjene u Statutu općine i jedna izmjena u Poslovniku o radu, a Vi treba da to razmotrite.

MAHIR DEVIĆ – zamjenik predsjedavajućeg

Dao je na razmatranje Izvještaj o radu Komisije za provođenje izbora u mjesnim zajednicama na području općine Ilijaš, kao i prijedlog Odluke o dodjeli mandata za članove Savjeta Mjesnih zajednica na području općine Ilijaš.

Znači, od 14 MZ-a, može se reći da u 12 MZ-a nema prigovora i nikakvih sporova, a u 2 MZ-e postoje prigovori (MZ Kamenica i MZ Ilijaš Grad). Ne mislim da je bilo ko šta krivo uradio, niti Komisija niti ljudi na terenu koji su provodili izbore.

Predlažem OV-u da kao ozbiljan organ, stavi tačku na ove dvije vrste priče. Mislim da je bila greška slati ove žalbe na drugostepenu stručnu komisiju, jer, koliko ja znam, ona s ovim nema veze, a prvostepena komisija ste vi i vi dajete konačnu odluku. Zamolio bih da raspravu usmjerimo na ove dvije mjesne zajednice gdje postoje prigovori i da usvojimo određene zaključke i vidimo u kom pravcu djelovati. Predlažem da nam obrazložite

dešavanja i hronologiju šta se dešavalo u ove dvije mjesne zajednice, tj. da nas informišete šta je vas vodilo, sem ovog što ste poslali na drugostepenu stručnu komisiju, jer mislim da to nije ispravno, ali to nije ni važno.

KERIM MUMINOVIĆ - član Komisije za provođenje izbora u mjesnim zajednicama

Mjesna zajednica Kamenica – činjenice stoje ovako. Obzirom da je postojao pritisak građana, pored kompletnog izbornog materijala, po završeni izborima, dobili smo 7 koverata u kojima su bili glasački listići (mi smo našli rješenje, građani su upisali svoje ime i matični broj da bi mi provjerili da li se nalaze na biračkom spisku). Od tih sedam ljudi, samo je jedna osoba bila prijavljena na tom biračkom spisku. Znači birački odbor nije uvidio da se ta osoba nalazi na biračkom spisku (to je greška biračkog odbora). Mi smo to primili k znanju. U zapisniku o radu biračkog odbora u MZ Kamenici je upisano nekoliko primjedbi na rad biračkog odbora. Zakon je tačno propisao u kojim uslovima se može ponovo vršiti prebrojavanje biračkih glasova. To je jedna od propozicija. Onaj ko traži ponovo prebrojavanje, mora dati broj listića koji su nevažeći. Znači da je ta sumnja utemeljena na nečemu. To mi u Kamenici nismo dobili, nismo mogli steći uvid u kom obimu se kreće ta greška i taj zahtjev mi smo, kao komisija, odbili.

MAHIR DEVIĆ – zamjenik predsjedavajućeg

Ne mislite li Vi da je komisija, zbog transparentnosti, trebala još jednom izvršiti prebrojavanje ? Zašto je to bio toliki problem komisiji ?

KERIM MUMINOVIĆ - član Komisije za provođenje izbora u mjesnim zajednicama

Problem nije bio u brojanju. Pravni osnov je jako bitan i nije ga bilo.

Ja kao član komisije priznajem svoju grešku u ovome što je upućeno na drugostpenu komisiju, i ne mislim da sam bilo šta pogriješio, uslovno je priznajem. Moglo se ljudski, ali je najgore što mi mnoge stvari rješavamo ljudski, a ne u skladu sa zakonom, pa onda imamo niz problema. Ova se komisija nastojala pozivati na Statut općine i Statut MZ-e.

Da bi se ispoštovali svi zakonski okviri, mi smo žalbe odbili i uputili ih na drugostepenu stručnu komisiju.

Mjesna zajednica Ilijaš Grad – dobili smo deset koverti koje su u sklopu biračkog materijala došli nama. Šest koverata smo provjerili i ljudi se nalaze na biračkim spiskovima drugih mjesnih zajednica, a četiri koverta su bila sa imenima bez matičnih brojeva. Znači, mi nismo imali osnovni identifikacioni podatak da bi mogli ući u bazu podataka CIK-a da bi mogli otvoriti koverta i da ih priključimo broju glasova onako kako su ljudi glasali.

MUHAMED HANDŽIĆ – BPS-Sefer Halilović

Ova tačka zaslužuje veliku pažnju, jer se radi o volji preko 6000 građana na općini Ilijaš. Kako reče koordinator za MZ-e i dio “devastirane” komisije da su, po njima, izbori provedeni u skladu sa zakonom i da su provedeni korektno, a nisu to izvještajem dokazali, onda se ja pitam šta mi ovdje čitamo. Piše da niste zapečatili prostoriju do 14-og, da je ostala otvorena, a pričate nam o regularnosti izbora, prije svega, u MZ Kamenici i MZ Ilijaš Grad. Ja sam bio jedan od kandidata, ali neću pominjati svoju MZ-u, zbog korektnosti prema kolegi koji je dobio izbore na mojoj mjesnoj zajednici i čestitam mu na tome, ali zbog drugih kandidata je nekorektno da se kaže da je proteklo sve uredno, izglast ćete

mandate, i prešutjet ćete. Vjerujte da nećemo prešutjeti i ovi ljudi se s pravom žale i vjerovatno će uložiti tužbe protiv vas koji ste proveli izbore, a niste ih proveli korektno, niste ih proveli u skladu sa zakonom, sa zakonom o principima lokalne samouprave i niste ih proveli u skladu sa Statutom općine i u skladu sa Odlukom koje je donijelo Općinsko vijeće. Za sve ovo imam činjenice i dokaze. Prva od njih su komisije koje ste formirali, navodno nekim žrijebom, a i taj žrijeb nije proveden u skladu sa zakonom. Znači, morate se pozabaviti sa činjenicama, sa materijalom koji ste nam dostavili u prilogu, jer mi nismo svi ovdje "ovce", nas 25, pa da samo gledamo u ovaj papir i mislimo da je so i da ližemo. Mnogi od nas ovo pročitaju i znaju o čemu se radi. Ja sugerisem kolegama da ovaj izvještaj ne prihvatimo, ja ga neću prihvatiti i neću glasati za mandate bilo kome dok se ne riješe ova dva slučaja u Kamenici i Ilijašu gradu.

AMAR DOVADŽIJA – vijećnik SDA

Nadovezao bih se na kolegu Handžića, jer očigledno izvještaj ne potkrepljuje ovo što govorite gospodine Muminoviću. Kazali ste da je u Kamenici jedna koverta presudila, a u izvještaju naveli ste da je komisija izvršila javno žrijebanje za tri mjesne zajednice za koje, zbog nekompletnosti podataka nije izvršeno žrijebanje. Nisam baš razumio ovu rečenicu. Ukoliko je bilo to žrijebanje, kažite nam kada je izvršeno i u čijem prisustvu ? Drugo, ukoliko je ta koverta donijela presudu, imate li u zapisniku biračkog odbora, poslije prebrojavanja, koliko je koverti bilo na licu mjesta ?

Također mi stvara sumnju u MZ Srednje, gdje je Podružnica Nišići bojkotovala izbore zbog nezadovoljstva sa stanjem u toj podružnici. Dalje kažete da je to jeda od bitnih dokumenta za zakonit i efikasan rad komisije, a komisija ga nije dobila uprkos zahtjevu. Dalje, interesuje me Savjet MZ Kamenica, a znam koji su ljudi ušli u savjet, otkud Bibić Ramiz ako je bio na osmom mjestu po broju glasova.

ADEM EFENDIĆ – vijećnik SBB

Kao što ste vidjeli na početku sjednice, ja nisam bio za to da se ova tačka uvrsti ovako ishitreno, ali šta je tu je i uzet ću učešće u diskusiji.

Ne znam u kom je svojstvu bio čovjek Čeho Midhat, ako se zna da izvještaj podnosi predsjednik komisije, a da komisiji-radnom tijelu pomaže administrativno-tehnička služba Općinskog vijeća. Vi ste koordinator i bespotrebno ste izlazili za govornicu. Pomenuli ste SBB, a SBB nije učestvovao u izborima, kao niti bilo koja politička partija.

U odluci tačno piše ko se imao pravo kandidirati na izborima.

Ja ću krenuti od Odluke o provođenju izbora u mjesnim zajednicama. U članu 3. je navedeno da će izbore provesti Komisija za poslove mjesnih zajednica i saradnju sa drugim općinama i gradovima. Tu komisiju, po rješenju, čine: Mehmed Smajlović-predsjednik, Selvir Huseinović-zamjenik predsjednika, Hajrudin Musić-član, Mehmedalija Gušter-član i Kerim Muminović-član. Dolazeći u sukob interesa, predsjednik i zamjenik predsjednika podnose ostavku, ali kome su podnijeli ostavku, ako su rješenje dobili od Općinskog vijeća ? Dalje, nelegalan rad komisije u daljem dijelu, sve što je rađeno. Od tada sam ja intervenisao kod općinskog načelnika da to pokuša zaustaviti da ne ode u pogrešnom pravcu kao što je već otišlo. U članu 41. Poslovnika OV-a se kaže, o radnim tijelima, da sjednice zakazuje predsjednik, a u njegovoj spriječenosti njegov zamjenik. Ne piše da član može zakazati sjednicu. Dalje, svo vrijeme govorite da ste se držali zakona, a niste se držali ni Poslovnika.

Ja, kao građanin, nisam mogao uzeti učešće u izborima zato što nema ko da sprovodi izbore, a ovo što ste vi radili, vi ste za mene bili "mutljaroši" u svemu ovome, pa ste se i za

ovom govornicom pozivali na Izborni zakon. Ja sam kontaktirao gospodu iz CIK-a koji su se izuzeli iz ovoga, jer nisu nadležni za ove izbore. Također ću vam reći jednu vašu katastrofalnu grešku, a odnosi se na to da se biračko mjestu određuje prema broju birača koje u pravilu ima do 80, a ne može biti više od 1000 birača. Kažite mi koliko je birača bilo na biračkom mjestu u Podlugovima, gradu Ilijašu itd. i šta da je izlaznost bila 90% ? Da li bi mogli glasači izvršiti glasanje za tri dana ? Ja vaš izvještaj nisam ni čitao, jer ste za mene ne legalni. Zašto onda niste sprovodili Izborni zakona onako kako u njemu i piše.

Izađite gospodine Kerime za govornicu i objasnite ljudima u Kamenici ono što ste govorili jednom od članova komisije u ostavci, za kovertu gdje Vas je čekala ovjerena i Vi ste rekli da ćete ga podržati. Gospodinu Selviru Huseinoviću ste rekli Vi, kao član komisije, da Vas je čekala koverta ovdje ovjerena i da ste je otvorili i rekao si da on pokrene istragu oko toga, a da ćete Vi to potvrditi.

ALAN ŠERAK (replika) – vijećnik SDP-a

Replika se odnosi na ono što su vjerovatno lične frustracije vijećnika Adema Efendića iz razloga zato što Kerim Muminović nije dozvolio jednom od kandidata da bude kandidat za mjesnu zajednicu, a nije na biračkom mjestu te mjesne zajednice. Vama gospodine Kerime sugerisem da više ne izlazite za govornicu i ne dajete više nikakve odgovore, jer niste dužni kao član komisije, nego to treba uraditi onaj ko je preuzeo na sebe da predsjedava tom komisijom, a to je onaj gospodin koji je utrpao nama ovo na dnevni red, a onda se nije pojavio na ovoj sjednici, a Vas izložio ovdje. Nemojte nasjedati na ove provokacije, a ja Vam se zahvaljujem na onom što ste rekli, a za sve ostale odgovore po pitanju rada Vaše komisije, neka gospodin dođe i neka nam odgovori.

MAHIR DEVIĆ – zamjenik predsjedavajućeg

Koliko mi je poznato, gospodin Kerim po dogovoru, predstavlja komisiju. Sugerisem da se diskusije vode u pravcu kako bi se ovo privelo kraju.

NIJAZ RASTODER – vijećnik LDS

Što se tiče pripreme izbora ne želim ništa komentarisati. Ovdje se osjećam prozvanim od strane Čehe Midhata. Bio sam posmatrač za izbor u gradu od 07 h do zatvaranja biračkog mjesta – do prebrojavanja. Zahvaljujem se gospodinu Kerimu što je lijepo objasnio dužnost posmatrača i zahvaljujem se Mahiru što je rekao da smo imali problema sa vijećnicima. Da, ja sam imao teške probleme sa dva vijećnika koji su napadali biračko mjesto dovodeći narod, a žene su bukvalno plakale. To su bili vijećnici koji nisu iz MZ Ilijaš Grad. Jedino se tu mogu zahvaliti kandidatu Fuadu Derviševiću koji se krajnje korektno ponio, a svi ostali kandidati su bili vrlo napasni i ovo govorim kao posmatrač. Da li je moj autoritet poznavanja ljudi u gradu pomogao da neko zaokruži nekoga, to ne znam, ali bilo je napasti od strane vijećnika. U jednom trenutku su bila četiri vijećnika, bilo je predsjednika stranaka. Odgovorno tvrdim da je glasanje proteklo korektno, a takođe i brojanje glasova. Molim vas da ne dovodite u pitanje volju građana, jer ukoliko to uradite imat ćete problem sa građanima, a ne sa mnom.

MAHIR DEVIĆ (replika) – zamjenik predsjedavajućeg

Ja tebe kolega Rastoder nisam ni jednom prozvao imenom i prezimenom i molim te da ne spominješ moje ime i prezime. Ostavi se političkih odnosa.

MUHAMED HANDŽIĆ (replika) – vijećnik BPS-Sefer Halilović

Kolega Rastoder kaže da je sve bilo regularno, a gospodin Kerim je rekao da su bile četiri koverte bez matičnih brojeva i kako je komisija dozvolila da se glasa bez matičnog broja i kako će se izvršiti provjera ta četiri lica ? Kako ćete nas uvjeriti da je sve regularano ?

FAHIR HASANOVIĆ – vijećnik SDA

Ja, prije svega mislim, da svu ovi izbori sve, osim da su regularani. Regularno jeste da su ljudi izašli i da su glasali.

Savjet MZ Gajevi – nije mi jasno zašto nema Mahira Gljive u savjetu.

Savjet MZ Dragoradi – ako su podružnice zastupljene, zašto nema Vladajevića. Ako se niko nije prijavio, neko je morao voditi računa o tome, ili da se prijavi ili je onda trebalo ići po broju glasova. Znači, u MZ Dragoradi imamo savjet od pet članova. Ako je ovo korektno, onda nije korektno ono što se desilo u MZ Gajevi. Odlučite se šta je korektno i ispravno.

Ono koliko sam ja čuo, nisam zadovoljan sa radom načelnikove službe i sa radom komisije. Po meni, ovi rezultati nisu regularni (Gajevi i Dragoradi). Jedno nije uredu, a vi se očitujte i kažite koje.

SAUDIN DURMIĆ – vijećnik SDA

Iz izvještaja jednog od članova komisije koji nas je ovdje ubijedio da je sve “med i mlijeko”, trebali ste nam i pismeno dokazati da je tako. Od samog početka procedura je krenula nakaradno. Uočili ste da nemate predsjednika komisije, pa ste telefonom “molili” nekoga nešto. Interesuje me u koliko ste časova stavili pečat i mislim da “kanap” koji ste pominjali nije problem, mogli ste posuditi od nekoga.

Ja nisam pravnik, pa pitam dopredsjedavajućeg, materijal koji smo dobili, Izvještaj o o radu Komisije za provođenje izbora u mjesnim zajednicama na području općine Ilijaš je sa dva poglavlja (jedno poglavlje je činjenica o radu komisije, a drugo poglavlje tretira izmjene Statuta općine Ilijaš). Je li prijedlog mjera sastavni dio dokumenta za koji ćemo se danas izjasniti. Hoćemo li mi svojim podržavanjem i li ne podržavanjem ovog izvještaja pokrenuti izmjene Statuta općine Ilijaš. Još želim izraziti žaljenje što se bačena sjena na ovaj proces jer su se građani potrudili u veliko broju izašli na izbore.

Smatram da je bilo nekorektno da se bilo ko miješa iz ovog Vijeća u posao posmatrača, a ako je trebalo posmatrača ovo Vijeće broji 25 vijećnika-vijećnica i svi smo se mogli uključiti.

MAHIR DEVIĆ – zamjenik predsjedavajućeg

Kazao je da to nije trebalo biti uopšte napisano u ovom izvještaju. To je samo prijedlog, sugestija nama vijećnicima.

NIJAZ RASTODER (replika) – vijećnik LDS

Kolega Saudine, ja sam na biračkom mjestu bio posmatrač kao građanin, kao slobodan čovjek koji poslije radnog vremena može da radi šta hoće. Nisam bio posmatrač u svojstvu vijećnika i nemojte mi ti spočitavati.

MAHIR DEVIĆ – zamjenik predsjedavajućeg

Mislim da mi vijećnici vodimo potpuno pogrešnu diskusiju i ta diskusija baca sjenu na ove izbore, na kojima nema nikakve sjene. Ovo što sada diskutujete, ja sam djelimično bio uključen u te izbore u nekim mjesnim zajednicama, ali ono što se dešavalo na terenu je volja naroda. Prema tome, sada postavljati legitimnost izbora je potpuno pitanje koje je ad acta. Ovdje treba razmotriti ove dvije situacije u MZ Kamenica i MZ Ilijaš Grad.

Naravno, nisu se složile kockice ni političkim partijama, ni pojedincima, ni ovim ni onim, ali ne vidim razloga zašto sada da gledamo tim pobjedama u “zube”.

Ovo što sam do sada čuo od gospodina Kerima je korektno, ali samo treba da ljudski obrazloži zašto nisu skinuli “mrlje” sa ova dva mjesta. Vjerovatno to nisu “mrlje”, ali su trebali još jednog to pregledati.

RASIM ŠEHIĆ – vijećnik SDA

Po meni, ova komisija kao da je pisala izvještaj protiv sebe. Mi možemo diskutovati šta hoćemo, a ovdje smo čuli neke kolege i po nekim izjavama mislim da ima elemenata krivičnog djela. Neću nikoga po imenu spominjati, koristit ću izraz komisija. Kada uzmemo početak rada komisije, ostavke predsjednika i zamjenika predsjednika komisije, vjerovatno smo mi, kao Vijeće, trebali prihvatiti te ostavke i imenovati novog predsjednika i zamjenika predsjednika. Zatim, zbog transparentnosti, komisija je trebala pri izboru kandidata da to radi transparentno i čisto sumnjam da postoji zapisnik da su tu prisustvovali kandidati. Ako imate zapisnik, to bi mi odagnalo sumnju. Dalje, interesuje me, da li je uopšte po Zakonu o zaštiti ličnih podataka ispravna situacija da se ljudi imenom i preizmenom, matičnim brojem evidentiraju i da taj jedan pojedinac bude “teži” na kraju nego 100-200 ljudi. Druga stvar što je za mene ne utemeljena od komisije jeste da se nisu uvažili prigovori iz razloga što se nisu naveli sporni ne važeći listići. Sada vas pitam šta da je bila situacija, da hipotetički kažem, da nije bilo nijednog spornog listića ? Da li to znači da kandidat nije mogao uložiti prigovor sumnjajući da u tim važećim postoji ne važeći listić ? Tu apsolutno nije bilo osnova. Na fonu ovoga svega i ovo što je Mahir rekao, vjerujem da je u ovih dvanaest mjesnih zajednica čista situacija, te kako bi uštedjeli općini da izbjegnemo drugostepenu komisiju kada je sve ovako čisto i transparentno, predlažem zaključak da se u MZ Ilijaš Grad i MZ Kamenica ponovo izvrši brojanje glasačkih listića uz prisustvo komisije i posmatrača. Znači, da ne diskutujemo dalje, nego da donesemo ovaj zaključak.

BESIM GLJIVA – vijećnik Stranke za Srednje

Mislim da je neko već rekao da smo otišli u krivom smjeru i da bi trebali pričati o nečem sasvim drugom. Ja ovoj komisiji čestitam, prvenstveno, ako uzmemo u obzir uslove u kojima su radili. Ovdje ne treba samo tražiti primjedbe, a evo kolega Šehić je predložio da ponovo prebrojite glasačke listiće, samo bih još dodao da budu prisutni i kandidati. Ako komisija procjeni da na ova dva sporna mjesta ima listića na kojima se nije glasalo onako kako je glasala odluka, postoji mogućnost da komisija u ponovnom postupku odbaci te listiće. Znači, eto mogućnosti da se neke stvari isprave.

MAHIR DEVIĆ – zamjenik predsjedavajućeg

Slažem se sa svim što je rekao Besim Gljiva. Mislim da je diskusija ispravna s aspekta da se stvari očiste do kraja.

Vijećnici Adem Efendić, Sead Šehić i Akif Bešlija otišli sa sjednice.

NIJAZ RASTODER – vijećnik LDS-a

Iz diskusije kolege, trenutno predsjedavajućeg, osjećam da će se pokušati vršiti neke mahinacije u smislu kada je rekao da neke glasove koji imaju namjere. Namjere su izrečene i komisija koja je prebrojavala odbila je glasove sa tim namjerama. Ne može biti “kružić tu”, pa crtica pored još nekog. Namjera je za jednog, a ne za dvojicu. Prema tome, mislim da idemo u van zakonske mogućnosti i bojim se vaših “dobrih” namjera.

Diskutanata po ovoj tački dnevnog reda više nije bilo, pa je Općinsko vijeće odlučilo da sjednicu prekine kako bi Komisija za provođenje izbora u mjesnim zajednicama općine Ilijaš u roku od sedam dana mogla izvršiti ponovno brojanje glasačkih listića u MZ Ilijaš Grad i MZ Kamenica, te nakon toga će biti odražen nastavak sjednice o čijem terminu će svi biti blagovremeno obaviješteni.

MAHIR DEVIĆ – zamjenik predsjedavajućeg

Dao je na glasanje predloženi zaključak, pa je Općinsko vijeće većinom glasova i sa jednim 1 UZDRŽANIM glasom donijelo

ZAKLJUČAK

Nalaže se Komisije za provođenje izbora u mjesnim zajednicama općine Ilijaš da u roku od 7 (sedam) dana izvrši ponovno brojanje glasačkih listića u MZ Ilijaš Grad i MZ Kamenica uz prisustvo spornih kandidata i njihovih posmatrača, te nakon toga da navedena komisija dostavi izvještaj Općinskom vijeću Ilijaš.

Sjednica prekinuta u 15:30h.

NASTAVAK 18.SJEDNICE OPĆINSKOG VIJEĆA

08.05.2014.godine sa početkom u 17:00 h

Nastavkom sjednice predsjedava predsjedavajući Općinskog vijeća Damir Filipović koji je konstatovao da postoji kvorum za odlučivanje.

Prisutni vijećnici:

| RB. | IME I PREZIME |
|------------|----------------------|
| | SDA |
| 1 | MAHIR DEVIĆ |
| 2 | NEDIM MATORUGA |
| 3 | SAUDIN DURMIĆ |
| 4 | HALID DIZDAREVIĆ |
| 5 | AMAR DOVADŽIJA |
| 6 | - |
| 7 | FAHIR HASANOVIĆ |
| 8 | RASIM ŠEHIĆ |
| 9 | SELMA PUŠINA |
| | SDP |

| | |
|-----------------------------|-----------------|
| 10 | ALAN ŠERAK |
| 11 | - |
| 12 | DAMIR FILIPOVIĆ |
| 13 | SELVER HERIĆ |
| SBB | |
| 14 | - |
| 15 | - |
| 16 | - |
| 17 | - |
| SAMOSTALNI VIJEĆNICI | |
| 18 | - |
| 19 | ASIM MUJIĆ |
| STRANKA ZA SREDNJE | |
| 20 | BESIM GLJIVA |
| 21 | AIDA MALIŠEVIĆ |
| LDS | |
| 22 | NIJAZ RASTODER |
| 23 | NIHAD BUČUK |
| BPS | |
| 24 | MUHAMED HANDŽIĆ |
| SAMOSTALNI VIJEĆNIK | |
| 25 | DIZDAREVIĆ ENES |

Odsutni vijećnici:

1. Muamer Dervišević
2. Marioneta Ilić-Jureta
3. Nijaz Mašić
4. Sead Šehić
5. Akif Bešlija
6. Edhem Hasanović

Prisutni gosti:

1. Semir Spahić – Radio Ilijaš
2. Mehmed Smajlović – MZ Mrakovo
3. Alen Matoruga – MZ Misoča
4. Hajrudin Musić – član Komisije za provođenje izbora u MZ-a
5. Kerim Muminagić - član Komisije za provođenje izbora u MZ-a
6. Mehmedalija Gušter - član Komisije za provođenje izbora u MZ-a
7. Adela Bešlija – volonter

Ostali prisutni:

1. Alma Imamović – pomoćnik načelnika
2. Ilda Kahriman – sekretar OV-a
3. Midhat Čeho – koordinatorka za rad sa MZ-a
4. Maida Habibović - zapisničar

Izveštaj o radu Komisije za provođenje izbora u mjesnim zajednicama na području općine Ilijaš

MIDHAT ČEHO – koordinator za rad sa mjesnim zajednicama

Ja očekujem da će se ovo danas završiti, jer ono što je bio zaključak Vijeća, za mene kao profesionalca i komisiju je bio drag zadatak, jer su birački odbori odradili profesionalno i korektno svoj zadatak. Na taj način, sve sumnje koje su kod određenih vijećnika postojale, nadam se da su pale "u vodu". Sam čin brojanja, koji je konstatovan zapisnički, i išao je vrlo temeljito. Prvo se radio Ilijaš Grad i na molbu kandidata Sinanović Mevludina, prisustvovao je novi posmatrač i drago mi je što je to bio vijećnik Mujić Asim koji je izašao prezadovoljan, jer se još jednom potvrdilo da je birački odbor odradio posao korektno. Kod njega je stala dilema da li je sve korektno kada su u pitanju koverta, ali ćemo o tome poslije pričati.

Kada je u pitanju Kamenica, desilo se isto, rezultati su potvrđeni kao i prvi put.

Imam potrebu, da par dilema koje su ostale kod vijećnika Amara Dovadžije i Fahira Hasanovića otklonim, a vezano za dodjelu mandata ljudima koji su po rang listi bili 6 ili 7. Ova komisija je primijenila odluku iz 2005. i 2010. godine koja pobliže objašnjava teritorijalni princip koji je vrlo važan. Tako da se ove dileme odmah otklanjaju po ovom principu. Ovo je značajan pomak kada je u pitanju podružnica.

Evo još nekoliko statističkih podataka. Od 6200 izlazaka tj. 32%, svaki birač je ovu općinu koštao 1,15 KM, da su izbori koštali cca 5500 KM što je, morate priznati, vrlo skromno za jedan ovakav proces. Od 9 žena koje su se kandidovale 7 žena je ušlo u savjete. U Ljubini su tri žene ušle u savjet. Svim predsjednicima i članovima savjeta čestitam i želim uspjeh u radu i molim Vijeće da podrži rad komisije koja je na pravom putu da oblast mjesne samuprave popravi i molim vas da sve odluke koje tretiraju način smjene i opoziva predsjednika savjeta da Vijeće ozbiljno primjenjuje i da ne dozvolimo luksuz da nam ne rade savjeti ili da se sve svodi na rad predsjednika. Isto tako volio bih da se primjeni praksa da predsjednici savjeta iznose svoje izvještaje, a ne da služba šalje "frizirane" izvještaje na Vijeće.

Još jednom ću zahvaliti svim biračkim odborima i Komisiji koja je dala veliki doprinos da ovi izbori budu korektni.

NIJAZ RASTODER – vijećnik LDS

Svaki čovjek ima svoju emocionalnu stranu. Ona se ogleda kroz dva čina, a to je osjećaj odgovornosti i osjećaj krivnje. Kada su ljudi u ovom Vijeću glasali i preuzeli odgovornost suda, znači preskočili sve komisije i donijeli, mimo zakona, odluku da se ponovo vrši brojanje, te tako povrijedili u lancu više od trideset ljudi. Svi smo mi i posmatrači, od koordinatora preko komisije, preko biračkih odbora povrijeđeni ljudi, preko kandidata. Na taj način su, ljudi koji su bili u izbornom procesu, su povrijeđeni. U ime tih ljudi kažem, ako vam je cilj bio da te ljude operete od nekih ljudi koji su to radili, napali (ne fizički) kao da smo neki kriminalci i lopovi onda vam hvala, a ako vam to nije bio cilj, nego da im se pridružite, tražim da se predsjednici klubova koji su glasali i samostalni vijećnici koji su glasali, da se izvinu i pokazalo se da smo bili vrlo korektno i da smo bez razloga napadnuti u ubuduće Vijeće ne treba preuzimati ulogu suda. Znači, ako ste htjeli da ispadnemo čisti hvala vam, a ako ste imali drugu namjeru molim vas izvinite se.

MUHAMED HANDŽIĆ – vijećnik BPS-Sefer Halilović

Nisam vašeg mišljenja gospodine Rastoder da nije trebalo ovo provesti što je provedeno. Mi vijećnici nismo ni sud ni sudije, ali mi moramo u skladu sa zakonom i funkcionisati. To se u večni slučajeva ne dešava. Većina vijećnika radi po svom nahođenju, dok nekog to ne bude koštalo i suda. Kada je Komisija u pitanju, tim je isti. Koordinator je podnio izvještaj kako su provedeni izbori i verifikovano je ono što je bio problem na prošloj sjednici. Nismo mi očekivali bolji izvještaj, jer neko kada napravi propuste, greške, ponovo se vraća na to i kaže "vidite da sam ispravan". Kažete da ste sve proveli po zakonu, pravilniku itd., a ja kažem da niste. Prvo, Komisija nije bila kompletna – niste imali ni predsjednika niti zamjenika predsjednika komisije. Ako jeste, kažite ko ih je imenovao. Druga greška – kada se tiče žrijebanja, kažite ko je od kandidata, ono što je predložio jedan od vijećnika, bio na žrijebanju gdje ste žrijebali Komisije. Ja sam bio jedan od kandidata i nisam prisustvovao niti ste me zvali na žrijebanje. Dalje, verifikacija izbornih rezultata. Sama riječ, ko i u koje vrijeme je to potvrđivao. Čuli smo od kolege da je dva dana bila otključana prostorija gdje se čuvaju kutije. Do 14-tog je bila otključana prostorija i mogao je ući ko je htio. Rezultati glasova u većini mjesnih zajednica su, po meni, uredu i čestitam svim izabranim predsjednicima izuzev Kamenice. Ja za to neću ni u kom slučaju podržati i ako će se u kompletu glasati, ja neću podržati. Ako će se pojedinačno glasati, samo neću podržati Kamenicu, jer izbori nisu provedeni po zakonu. Tu postoji prigovor koji je trebao stići do vijećnika. Ja ovo imam, ali ne vidim da imaju ostali vijećnici.

DAMIR FILIPOVIĆ – predsjedavajući

Ja sam razgovarao sa Kolegijem OV-a i do sada je žalbe rješavala ova komisija za provođenje izbora u mjesnim zajednicama, te će se i po ovoj žalbi očitovati.

MUHAMED HANDŽIĆ – vijećnik BPS-Sefer Halilović

U svakom slučaju ja ne želim da ovdje slušam kako je sve bilo po zakonu, propisima i u skladu standardima ove komisije i službe. Ja sam učestvovao u ovome i vidio da to nije ni izbliza tako. Na kraju svako od nas ima savjest i odgovornost, pa neka glasa kako ko hoće.

MAHIR DEVIĆ – zamjenik predsjedavajućeg

Ja sam mislio da smo prošli put ovo riješili 90%, bilo je dosta prostora za replike mojim prethodnicima, ali mislim da one nisu korisne u ovom momentu, nego se mogu svrstati u neki oblik amnezije u odnosu na prošlu sjednicu Vijeća, gdje niko od prisutnih vijećnika nije postavio pitanje legitimiteta bilo koga od ovih ljudi koji su izabrani. To što neki ljudi rade po objektima i kafanama i uzbuđuju druge ljude i navraćaju jedne na druge, neka služi njima na čast. Mi ovdje nismo pričali ni o jednom imenu ni prezimenu, niti smo kazali da neko nije dobio niti da jeste dobio određeni broj glasova, nego je ovdje bio korektan zaključak Vijeća koji je rasteretio dva izborna mjesta gdje su bile žalbe. Ja nisam ni jednog momenta posumnjao da ćemo imati drugačiji rezultat nego što smo imali prošli put, ali je bilo potrebe da se i na tu stvar stavi tačka, da se tenzije smire i ljudima dodjele mandati. Prema tome, sve ovo što smo sada govorili, nema savršenog izbornog procesa, nema izbornog procesa bez djelimičnih manjkavosti i u tom segmentu se, na neki način, mogu složiti sa kolegom Handžićem, jer ne postoje savršeni izbori. Za ove izbore se može kazati da su bili korektni, da su provedeni u jednoj demokratskoj i fer izornoj kampanji, a oni koji se kunu u

pravilnosti, obično prave nepravilnosti i to je neko pravilo. Ja mislim da mi, kao Vijeće, ne trebamo ići u neke posebne rasprave, ljudi koji su dobili najveći broj glasova, dobili su povjerenje svojih mjesnih zajednica i njima treba dati mandate sukladno onim stvarima koje su se desile na terenu, a bilo koja daljnja rasprava, replike i postavljanje bilo kakvih upitnika nas ne vodi ka rješenju. Činjenice su da su ljudi glasali i dali povjerenje za četrnaest ljudi. Lično mislim da je bolje što je ponovo izvršeno brojanje u MZ Kamenica i Ilijaš Grad. Predlažem Vijeću da glasamo i usvojimo ovaj izvještaj.

SELVER HERIĆ – vijećnik SDP-a

Izazvan govorom vijećnika Rastodera izašao sam za govornicu. U dosta stvari, slažem se s njim, samo me čudi njegovo ne iskustvo u ovoliko vijećničkog staža. Gospodine Rastoderu, recite mi šta bi se desilo da smo glasali i da se odluka nije izglasala ? Pa desilo bi se ono da za šest mjeseci ne bi smo imali pravo ponovo glasati. I Vi sada zamajavate i one koji su birani i one koje ste prozvali. Zato Vas pozivam da se izvinete i onima koji su izabrani i one koje ste prozvali. Znači, one koje Vi forsirate, ja poštujem možda više nego Vi, i čestitam im i ovaj put, i ti isti ne bi bili izabrani za šest mjeseci da se glasalo kako ste vi htjeli, jer vidjeli ste da nije bilo volje za izglasavanje. Drugo, moram i ovo reći. Poštujem sve (prebrojano-izbrojano), ali čudi me da se baš u izbornom mjestu gdje je identičan broj glasova nađe plus jedan. Volio bih da čujem ko je ta osoba plus jedan. Još jednom čestitam izabranim.

BESIM GLJIVA – vijećnik Stranke za Srednje

Kao što već neko reče i ja sam mislio da smo na prošloj sjednici dosta toga završili i danas samo da potvrdimo. Kolega Handžiću djelimično se slažem u nekim stvarima sa Vama, međutim Komisija je ovo uradila, možda i savršeno, u uslovima u kojima je radila. Tako da ne bih upućivao primjedbe na njihov rad. Siguran sam da se može vjerovati ovim ljudima u Komisiji i da su radili korektno. Nema potrebe da pravimo dramu o izbora i čestitam izabranim.

MAHIR DEVIĆ – zamjenik predsjedavajući

Mislim da treba podržati ovaj izvještaj i završiti sjednicu.

KERIM MUMINOVIĆ – član Komisije za provođenje izbora u mjesnim zajednicama

Imam jednu molbu prema vijećnicima, a izvještaju smo zamolili, obzirom da je istekao zakonski osnov za rad ove komisije, kome ćemo predati ovaj materijal i u kom roku ?

MEHMED SMAJLOVIĆ – predsjednik Komisije za poslove mjesnih zajednica i saradnju sa drugim općinama i gradovima

Svi smo na zajedničkom putu ka unapređenju i poboljšanju lokalne samouprave. Koristim priliku da čestitam svima onima koji su izabrani i sugerišem im da poslije ove sjednice zakažu konstituirajuće sjednice, sazovu savjete i krenu u rad, a mi da se bavimo unapređenjem i da djelujemo koordinacijski. Ja se nadam od ovih kolega koji su dobili mandate i mlađih da ćemo kroz edukaciju popraviti ovaj segment.

DAMIR FILIPOVIĆ – predsjedavajući

Zaključio je raspravu po pitanju devete tačke.

Želim samo konstatovati da po Poslovniku o radu Općinskog vijeća za rad komisije su potrebna tri člana i ne navodi se da je potreban predsjednik. Predsjednik je samo dužan sazvati sjednicu.

Slažem se sa kolegom Mehmedom Smajlovićem da treba izvršiti edukaciju novih članova savjeta mjesnih zajednica.

Diskutanata po ovoj tački dnevnog reda više nije bilo, pa je OV-e sa 15 glasova ZA i 1 UZDRŽANIM usvojilo

Izvještaj o radu Komisije za provođenje izbora u mjesnim zajednicama
na području općine Ilijaš

i donijelo

Odluku o dodjeli mandata
za članove Savjeta mjesnih zajednica na području općine Ilijaš

Zatim je predsjedavajući Damir Filipović zaključio 18. sjednicu OV-a u 17:45h.

Zapisničar:
Maida Habibović

PREDSJEDAVAJUĆI
OPĆINSKOG VIJEĆA ILIJAŠ
Damir Filipović, dipl.pravnik, s.r.

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ov_ilijas@bih.net.ba

